

章氏叢書三編

太炎文錄續編

卷六
卷七

章氏國學講習會編印



太炎文錄續編卷六目

章氏叢書三編

卷之上

李自成遺詩存錄

書顧亭林軼事

書譚茶陵遺事

書黃君玉田事

書宛谿翁事

書宜黃許貞女事

卷之下

西南屬夷小記

三界重建水閣記

張督師祠記

芷江劉公祠堂記

瑞安姚氏家廟記

量守廬記

史考八篇

書朱子春先生事

書范光啓事

書十九路軍禦日本事

書長沙張母事

游釣突泉記

湖州機業公會碑

童師長祠堂記

高橋杜氏祠堂記

古驩室記

黃氏藏書樓記

上海圖書館藏書



A541 212 0000 7516B

005740

太炎文錄續編卷六上

章氏叢書三編

李自成遺詩存錄

湖南石門縣者。舊隸澧州。西南有皂角鎮。則澧水東折之處也。其地有禪院。俗稱皂角寺。寺後有墓。碑書奉天和尙。道俗相傳爲李自成。以自成嘗稱奉天倡義大元帥也。寺有自成詩集。積久蠹爛。惟詠梅花詩存。余昔在施南聞其事。欲往觀之。事冗不果。今歲有人從津市以梅花詩來。則以木刻印行者。聞舊有百首。今存五首耳。自成自陝西南竄入湖廣境。相傳死於九宮。明史及王而農永曆實錄皆云自成以略食爲村民所斃。然其事暗昧。不足徵信者有數端。明史流寇傳言自成死在九月。實錄高李列傳言自成死在五月。其差已四月矣。按自成所部李過高必正等。實降於何騰蛟。實錄言八月高李諸軍渡湖。是其降在八月以前。然則自成敗死斷不得在九月。清人是語何從得之。明史又言獲自成兩從父及自成妻妾二人。然按高李舉營降明。自成妻高氏在焉。而清乃於事後獲自成妻妾。明爲虛妄。乃復謂高李降明在九月後。顛倒錯繆。至於如此。此明史不可信一也。明史於自成之死。一云自縊。一云鉏擊。又云大兵遣人驗尸。尸朽莫辨。夫形色膚理之異。朽潰則不可知。若鉏擊之與自

縊。其骨有傷無傷易辨。雖閱二三年。檢驗者猶能知之。清果遣人驗尸。何以縊死。鉏擊尙爲兩端之辭。則知驗尸實無其事。此明史不可信二也。自成部兵明史稱數十萬。實錄雖不具數。然十三家營以萬人爲一營。則兵數至十三萬可知。十三萬人飢疲。自成以數騎略食焉。能濟之。此明史與實錄皆不可信三也。輕騎略食必非寬衣大褶。明史稱剝衣得龍衣。此龍衣者爲袞服乎。則非輕騎所宜。爲中衣短襦織爲龍文者乎。則偏裨小寇亦得服之。見衣龍衣。眇一目者。何以定知爲自成。且驗尸之事既虛。則所云衣龍衣眇目者亦僞。此明史不可信四也。自成所部十三萬兵。縱爲村民掩斃。部曲報復。如洪爐燎毛髮耳。何以束手不報。聽其告於清人。此明史不可信五也。自成果死。高李必親言之。何以騰蛟告捷。朝士皆以自成未死爲疑。此實錄不可信六也。以此六疑。則自成之死竟無誠證。按實錄稱弘光元年春自成再敗於秦。由商維走襄樊。追兵復至。自成倉皇渡江。遂由巴陵北境奔入江楚界。五月自成至九宮山。食絕。自率輕騎野掠。爲土人所殺。李過等追及。良久乃知之。益懼。不知所爲。諸部從賊久。頗厭剽徙。爲虜大挫。心魂俱褫。聞南京立天子。欲降附。不知所介紹。禽田野民問之。乃知何騰蛟爲楚撫。遂欲因騰蛟降。顧因緣無由得達。方騰蛟之棄左軍而逸也。從九江斜走瑞州。由萬載入湖南。亦不知賊渡江事。猝聞平江瀏陽間有賊野掠。意爲土寇。遣長

沙知府周二南率二千人往擊之。過等既欲降。無格鬥志。按兵徐退。二南誤以爲怯。麾兵進薄其營。刃數賊。賊乃合戰。俄頃披靡。二南墜馬死之。賊追潰卒。呼欲與通語。皆益喪精魄。驚走歸長沙。騰蛟知爲大賊。惴惴嬰城守。過等斂兵不欲追長沙。執土人縱之走。詣騰蛟所道意。土人得釋即走。亦不爲通。久之稍傳聞至騰蛟所。乃募人持白牌齎手書往。過等大喜。遂舉軍降。八月率諸部渡湖。屯公安江陵間。連營百里。觀其降明之心懇至如此。實以甚畏清虜且聞南都有主故。然南都之亡正在正月。若於五月後始思反正。則不得云聞南京立天子。意者南都在時自成已有降志。而以負罪深重。不便歸附。故先去之。以紓其衆耶。是則皂角出家之說固未爲無因也。其詩五首。無草澤粗獷之氣。而舉止羞澀。似學童初爲詩者。亦舉事無就之徵也。以其有補史事。疏錄如左方。

松眼梅

松肥梅瘦雙堪畫。歲暮相親似弟兄。一操一妍神更爽。奇花珍木孰如君。

香雪梅

白玉花心白玉粧。枝枝倒掛笋琳琅。敲窗竄壁高低舞。又帶餘香上草堂。

雁來梅

邊外梅芳雁字開。隴羌性魯亦能栽。奉詔天使行邊後。帶得新香馬上廻。

放鶴梅

先生深隱湖山水。愛把冰花湖上栽。一味賞花情性古。梅妻鶴子日和諧。

夕照梅

一林凍雨新霽後。倒影纖紅射玉心。小鳥一羣枝上下。啾啾唧唧若枯吟。

史考

記永曆帝後裔

永曆帝崩於舊晚坡。從官遺嗣殆盡。然清乾隆時尙有宮裏雁者。爲永曆帝後。事見師範滇繫。其傳曰。桂家宮裏雁者。江寧人。故永明入緬所遺種也。緬劫永明時。諸人分散駐沙洲。蠻不之逐。謂水至盡漂矣。已而水至。洲不沒。蠻共神之。百餘年生聚日盛。稱桂家。兵力強。羣蠻畏之。徼外諸廠兵力不能支。蠻者請即往。時亦有敏家。大抵桂家之與也。宮裏雁貌偉而怪。滿面皆鬚。每鬪。矢不能及身。故爲蠻所畏。時與緬酋隙。乾隆十一年。茂隆廠主石屏吳尙賢欲和之。不聽。因搆緬與敏家戰。不勝。十七年。敏家破阿瓦。走其酋達刺。入據其城。有龔藉牙者。木梳之頭人也。十八年九月。與桂家戰。勝之。遂敗敏家。十九年正月。龔藉牙擊敗波龍廠。

走桂家。遂篡緬甸。其子孟絡嗣。與各部構兵如故。廿七年。宮裏雁爲所追。率其下謀內附。駐孟連。孟連土司刁派春苛索之。宮裏雁不受。土司約束。會石牛廠周彥青招之。宮裏雁念妻妾不相能。乃置其妻曩占及男婦千餘人于孟連。而挈其妾並奴婢六人赴廠。宮裏雁既去。刁派春分散其人於各寨。而置曩占及二女於城中。已而索其畜產。即與之。索其次女。即與之。索其長女。即與之。乃索曩占。曩占怒。乘夜進其家。手刃三十餘口。遂縱火。其徒見火光盡集。偕撒拉朶等奔孟養。遂歸緬甸。宮裏雁不知也。永昌守楊重毅聞變。欲以宮裏雁爲功。乃誦周某好逐之。至永昌。至省。不敢輕動。獄已具。殺之于巖城。以其妾婢六人及阿占阿九付功臣家。妾亦死之。宮裏雁素與木邦相依。既死。木邦遂降緬擾邊。緬禍自此起。滇繫所述云爾。胡清摧絕明代子孫。唯恐不盡。始必滅臺灣。後必殺宮裏雁。遺燼滅息。百無一二存。及民國更始。未嘗誅清裔一人。而更存其帝號世爵如故。可謂以德報怨矣。然桂家生齒既繁。不獨一宮裏雁。曩占之歸。其男婦盡從以往。則永曆猶有遺種。及緬甸滅于英吉利。其蹤迹遂不可得詳矣。抑緬甸之亡也。余年方十七。光復諸子亦先後篤生。是時中山黃陂二公已及弱冠。項城則殆欲統兵矣。貞下起元。其是之謂乎。

記李赤心後裔

李氏部曲既降於何中湘。李赤心封鄧國公。高必正封鄖國公。至永曆三年。赤心卒。必正兼統其軍。五年。必正爲孫可望所殺。餘軍推李來亨爲主。處鄖夔間。至清康熙三年。始敗死。赤心既以良死。騰衝李根源言赤心有後。在騰衝城東南二十里洞坪邨山後。更姓曰段。蓋永曆帝西走永昌。赤心之子實從。復從至緬甸。二年而帝爲緬甸送致虜軍。赤心得脫。遂寄居騰越。以段爲雲南大族。遂改稱段氏。以自晦。事見松滋王後朱氏家譜。以朱段世爲婚姻故。清末騰越有把總朱開寶。即松滋王後。貢生段爾超者。即李赤心後也。余按李氏部曲歸明者。視張氏部曲戰略固未足擬。然秉心純固。亦未有如孫可望之反覆者。當高李初反正時。自成妻高氏語赤心曰。汝願爲無賴賊耶。抑願爲大將耶。赤心曰。何謂也。曰。爲賊無論。既以身許國。當愛民受主。將節制。有死無貳。吾所願也。赤心自是無異志。必正即高氏弟也。永曆實錄稱其雅有志義。陳邦傳欲殺金堡。勸必正爲之。必正遂惡邦傳。奪其兵糧馬仗殆盡。又嘗請身爲諸將倡。以兵歸兵部。賦歸戶部。簡汰疲弱。分汎戰守。此二事皆非寇盜所能爲者。來亨處鄖夔間。十有四年。敗時部曲尙三萬人。或死。或逸去。就俘者纔百五十人。此則比于田橫壯士亦不遠矣。觀其一心爲民。未嘗攜貳。而赤心幸獨有後。是亦君子所樂道也。松滋王者。太祖第十五子遼簡王植後也。遼本封廣寧。永樂時遷荊州。簡王子松滋安惠王。

貴焯爲松滋始封。六世至王術經。萬曆二十七年襲封。史表不載術經薨年。亦無諡號。是必終於崇禎亡後。及荊州陷虜。亦不知術經所終也。然自萬曆二十七年至永曆十五年。首尾六十三歲。恐術經壽不至此。或薨在永曆初元。而子孫襲爵歟。自弘光以後。諸王承襲。史表皆不載。故莫能知其詳也。

記袁督師家系

明督師東莞袁崇煥。以勤王被讒死。其下獄在崇禎二年十二月。至三年八月磔於市。明史本傳言崇煥無子。故東莞不聞有督師後。袁項城慚于代清。嘗自謂督師苗裔。亦誣也。民國元年。予以事至關東。有清故黑龍江將軍壽山子來謁。其刺書袁某。余怪問曰。袁大總統起。君遂從國姓耶。對曰。非也。吾祖實明季袁督師。今落籍于此。問其原委。亦不能甚悉。歸見項城。時項城已有意稱督師後矣。從容問壽山家事。予曰。其子云云。此疑事。不可以質。項城笑曰。豈有督師子孫而忘仇事虜者乎。予亦是項城言。其實督師固無子。予與項城皆不記明史語也。逾十年。有北人與滿洲達官通家者。言壽山孫女爲某達官婦。亦自言督師後。且言督師家屬隨任在關外。既被執下獄。部將某驚突出關。護其家屬。後遂挾以降清。其言似近情。所謂部將者。即祖大壽也。督師既無子。降清者殆其兄弟近屬。世遠。故誤稱以爲眞子孫。

耶。以督師鎮遼之功亞於孫熊。勤王時力戰殺敵。與清爲深仇。其死又清人間之。宗族覩然隸清旗下。真隕其家聲矣。或以其時逮捕嚴迫。不歸清無自全理。且其權在部將。有不能自主者。然據何如寵傳。如寵以崇禎二年十二月入閣。帝欲族崇煥。以如寵申救。免死者三百餘口。而大壽潰叛以後。孫高陽密札諭大壽急上章自列。且立功贖督師罪。已當代爲剖白。大壽諾之。及高陽鎮關門。大壽即歛兵待命。至四年十月。大壽以守大凌河援絕糧盡。乃降于清。其時袁督師之獄已竟矣。謂大壽挾以降清求爲保全計者。固無其事。然以督師宗族三百餘口。寧知無落魄東竄者。且其宗族雖以何如寵申救免死。兄弟妻子猶擬流三千里。鋌而走險。事所或有。然竟以爲督師有子。則明史不可誣也。若以爲死後遺腹。或族人承嗣者。則亦不敢知也。

再書李自成事

余前以明史記李自成死事不實。作六疑以難之。近閱清世祖實錄靖遠大將軍阿濟格等疏報自成死事。則在閏六月。與明史所載在九月者又殊。按其事曰。閏六月甲申。靖遠大將軍利碩英親王阿濟格等疏報。流賊李自成親率西安府馬步賊兵十三萬。并湖廣等所屬各州縣賊兵七萬。共計二十萬。聲言欲取南京。水陸並進。我兵亦分水陸兩路躡其後。追及

於鄧州等七處。大破八次。賊兵力窮。入九宮山。隨於山中徧索自成不得。有降卒及被擒賊兵俱言。自成竄走時。携隨身步卒僅二十人。爲村民所困。遂自縊死。因遣素識自成者往認其尸。尸朽莫辨。或存或亡。俟就彼再行察訪。俘自成兩叔。并自成妻妾。又獲僞汝侯劉宗閔等。及術士僞軍師云云。是自成敗竄九宮。本在五月。而清臣則於閏六月奏報。或存或亡。究不得而辨也。秋七月壬子。攝政王諭阿濟格等曰。爾等先稱流賊已滅。李自成已死。故告祭天地太廟。今聞自成逃遁。現在西江。豈有如此欺誑之理。以此不遣使迎王等。據此清廷於自成之死。固知其虛造矣。合之明史永曆實錄所載。隆武帝及閩中朝士皆疑自成未死。則知縊死鉏擊悉爲讐言。由今度之。阿濟格奉命征討。則務於虛報戰功。何中湘撫安高李。則利於速了舊案。高李竭誠反正。則懼於引起猜嫌。故無肯證明自成未死者。乃隆武帝與清攝政王固知之。是非誠僞。不可誣如此。皂角出家之案。誠有其因緣也。明史欲言自成死於五月。則礙於攝政王七月之諭。欲言自成不死。則又有護惜寇賊之嫌。敘述之道既窮。於是強移其事於九月。冀以此彌縫焉。萬先生於此可謂進退維谷矣。

書張英事

革鼎之際。漢虜之變。降臣亦衆矣。其在進士末吏之屬。與處翰林部曹而未與朝政者。雖陷

身虜廷。不免清議。其實不足責也。若其家庭尊長盡瘁死國。然猶身仕虜廷。以致顯貴者。世人反不論。要其反易天明。甚於身仕兩朝者矣。桐城張英仕清至大學士。子廷玉亦至大學士。且封三等伯。配享清太廟。餘三子亦各官侍郎詹事。廷玉二子又並官內閣學士。一門鼎盛。爲清室世臣。英之伯父即明山東布政使張秉文。與清力戰偕妻妾赴水死者。英之父曰秉彝。則千里負骨携孤以歸者也。秉文之事在明史忠義傳。崇禎十一年冬。清兵自畿輔南下。本兵楊嗣昌檄山東巡撫顏德祖移師德州。於是濟南空虛。止鄉兵五百。萊州援兵七百。勢弱不足守。諸將觀望。清兵已臨濟南。秉文與巡按宋學朱等分門死守。晝夜不解甲。援兵竟無至者。明年正月二日。城潰。秉文擐甲巷戰。已被箭。力不能支。死之。妻方妾陳並投大明湖死。斯亦可謂至烈者矣。時秉彝以諸生奉父母家居。位走數千里。携孤負骨以歸。然則張氏與清誠有不能兩立者也。英勿能報。而又仕其朝。父子爲樞輔。秉大政。餘子貳宗並得臚仕。豈獨無以對其伯父。亦深負其父矣。清初儒者如潘耒。兄樞章以私史事爲清所殺。耒卒應詞科。入翰林。此已爲君子所詬矣。然耒時或以解禍。非以求榮祿。故雖剛正如顧寧人。猶有爲耒寬假之辭焉。若英者固非耒比也。王衷以父死于晉不仕。諸葛靚以父死于晉。終日不向洛京而坐。英與清爲伯父之仇。雖不若衷與靚之於晉者。然秉文夫婦死難。事關家門。

非一人之事。英忘仇事虜。父子洊居權要。且家門數世爲清貴。冑歸而入家廟。掃墳墓。當何顏耶。明徐達二子。輝祖爲建文守節。卒被幽死。增壽通欵燕王。亦先爲建文所戮。其後輝祖之裔仍襲魏國封。處南京。增壽之裔特封定國。處北京。羣從不相見。如英與其父所携秉文之孤。則猶定國魏國之比歟。且英廷玉仍世充明史館總裁。今明史稿及後定明史。秉文皆列忠義傳中。當其奮筆述事。已之不義。蓋亦心知之矣。世傳英妾私侍清聖祖。遂產廷玉。故清任廷玉特重。此蓋以其認賊作主。忿疾而爲之辭。魯桓公所謂同非吾子。齊侯之子也。雖然廷玉之罪自爲人倫所不齒。亦不賴此加誣語也。

書李巨來事

宋元間有朱陸異同之論。及姚江出而專爲陸學者亦微。唯清臨川李巨來猶以陸氏爲宗。全紹衣稱其泰山巖巖。且言庭臣稱已爲小李詹事。其慕往至矣。顧其述巨來入獄事。謂專以劾田文鏡故。則不了之說也。巨來爲直隸總督。當雍正四年。時世宗與諸弟不咸。而塞思黑死於囚所。巨來之獲譴。蓋與塞思黑事相因。蔣良騏東華錄。雍正四年六月。王貝勒等奏阿其那罪狀四十款。塞思黑及允禔罪狀十四款。請速正典刑。奉上諭。歷數三人罪狀一千餘言。末云阿其那塞思黑治罪之處。朕不能即斷。候再詳思。可將諸王大臣等所奏及朕此

旨頒示中外。八月。直隸總督李紱奏報塞思黑病故。又諭朕差胡什禮前往帶領塞思黑回京。胡什禮到京回奏。述李紱有塞思黑一到我便行事之語。朕聞知駭異。斷斷以爲不可。特命胡什禮馳往諭之。李紱奏稱並無此語云云。七年十月。諭謝濟世在阿爾泰軍前供出昔年參奏田文鏡。實出李紱蔡珽授意。又如塞思黑從西大通調回。令暫住保定。未幾李紱奏稱塞思黑患病。不數日奏報病故。而邪黨及無知之人遂有朕授意李紱戕害塞思黑之誣語。李紱並不將塞思黑自伏冥誅之處明白于衆。以致啟匪黨之疑議。則李紱能辭其過乎。至田文鏡公忠爲國。而李紱蔡珽極力陷害。指使謝濟世誣參。欲令言臣挾制朕躬。此風何可長也。李紱蔡珽著交刑部訊取確供。觀上諸件。即知巨來獲譴實以塞思黑之死爲主。而彈擊田文鏡事特借以發端耳。世宗爲人。險詖而強鷙。刻意欲殺其弟。顧外牽于親親之名。始言速正典刑。必自諸王大臣請之。而自己宥之。其既亦欲巨來希旨殺塞思黑。使名不歸于己。胡什禮奏述李紱語。即世宗所自造也。巨來堅不肯承。于是塞思黑暴死。此爲世宗使人戕害甚明。然巨來不死。則陰事終于宣泄。是其必欲殺之之因。豈果爲彈擊田文鏡事邪。卒以殺之無益。而更嫌于滅口。且見其廷訊對辭。但言臣罪當誅。請即正法。無乞憐語。若鹵莽而殺之。懼必臨刑大呼。宣其事于市。是欲蓋之而反愈彰。故終不得不赦焉。此以刀筆吏

之技而爲天子者。其技亦有時窮也。不然援蔡謝以攻文鏡。文鏡亦反攻之。事旣未成。其罪亦至細。何以廷臣議奏。言絀罪應絞者十七。應斬者六。必擠之凌遲處死。妻子財物入官而後快也。紹衣以事關皇室。碑文不能正其辭。亦姑假彈擊田文鏡事爲柄。然其言公歷官事迹。有事秘不能直陳者。此正指四年八月事。又其述巨來語曰。內省不疚。生死且不足動其心。何況禍福得失。所謂內省不疚者。即謂暗昧殺人之事。已未嘗屑爲也。或疑巨來事與近世趙秉鈞事相類。陰爲其主殺人。亦終不免於禍。焉知其不肯希旨邪。然觀清世道學諸臣。誠多作僞。巨來則猶傭中佼佼者。且以紹衣天性伉直。巨來果有陰慝。亦不至阿好如此。世宗所恨。正以不肯爲君任過耳。雖然。處胡虜之朝。而果於用世。遇賊害之主。直嫌疑之地。而不能先幾引避。使周程陸楊處之。必不然矣。觀巨來先奏塞思黑患病。次奏塞思黑病故。是雖不與戕害之事。要不得不先事起本。以爲其主弁飾。平居自謂直道事人。至是乃終枉。獨自奏報以外。終不肯以塞思黑自伏冥誅。宣示于衆。爲枉尋而直尺焉。使周程陸楊處之。亦必不然矣。江子屏作宋學淵源記。凡仕清與聞政事有顯名者。悉屏不錄。良有以也。巨來論學。不慊于真文忠。雖紹衣亦主之。文忠言行誠有不厭人意者。紹衣議之可也。濟王以無罪見誅。文忠則謂理宗處人倫之變。且請爲濟王立後。其處人主兄弟間。過巨來遠甚。

如巨來者無乃厚于責人而躬自薄歟。世宗之戾。自什伯理宗。然巨來以剛腸自任。亦謂賢于文忠之優柔者。卒其行已處變或不逮。故知以道學受清廷知遇者。則鳳德之衰已。

書呂用晦事

明末諸遺逸不入姚江之藩者。寧人桴亭所成就爲遠大。其學蓋主經世。與勃窣理窟者稍殊。次如應潛齋張楊園皆密近朱學。苦節艱貞。爲時輩所不逮。此與夏峯二曲諸公立言雖異。其躬行皆足以爲人師。不專以著述重也。若呂用晦則以俠士報國者。本非朱學。其始館黃太沖于家。用晦與子公忠皆北面請業。後與太沖立異。則以祁氏淡生堂書之爭。所爲者不過禮記集說東都事略二種。太沖發怒。因削其弟子籍。用晦遂以朱學與太沖抗。購書細故。成此大郵。用晦則誠薄矣。然祁忠敏本蕺山弟子。身旣死節。其子傾家爲國復仇。竟坐遣戍。太沖乘其衰落。入化鹿寺。載其書十捆而出。梨園年譜又藉用晦資力以取之。亦於故舊爲愬也。用晦以太沖主王學。欲借朱學與競。乃觀用晦文集。尙信呂洞賓事。是果爲朱學者邪。陸三魚祭用晦文。稱年四十不聞道。用晦與語。見始定。蓋亦未探其本也。由今論之。以學則三魚優。若夫分北華戎。義形于色。其媿用晦實多。祭文自傷不得從用晦於泉石間。蓋猶爲服善者矣。或視用晦爲坊肆評選之士。則不知用晦者。用晦本豪俠。祖父爲明淮府儀賓。家旣

給富。北都亡。年始十六。散萬金以結客。往來銅鑪石鏡間。竄伏林莽。數日不一食。事竟不就。清順治初。爲怨家所訐。從子亮功論死。而用晦得脫。爲保宗計。始易名光輪。出就試。至清康熙五年。仇復事定。乃棄諸生。見張符驥呂晚村先生事狀然性善治生。欲以家資有所就。公忠稱其大治宴飲。不失一匕。清世宗稱其日記所錄。微及糞壤。皆善治生之證。其選錄時文。蓋亦爲營業計。且以其易傳播。使人漸知有天蓋樓書耳。令方靈臯之徒不幸而誅。遺書盡燔。則人亦徒知其爲科舉之俊也。吾儕生二百年後。不能爲科舉文。讀其獄辭。猶能勃然發憤。以黯胡清。是豈其科舉程選所感耶。用晦舉事既不就。以被迫應童子試。旋即棄去。其名留良。取子房報韓義。觀其詩。率爲故國發憤。時若獷厲。如人口詩云。雞狗猪羊馬。又牛看來。件件壓人。獸之氣可見。要非可以飾爲者。繼志述事不得之于其子。公忠子康熙丙戌成進士。距用晦卒已二十四年。而得之于弟子嚴鴻達。沈在寬。則其所不意也。要之俠士報國。其人足重。朱學科舉皆非其素志云。用晦長子公忠。小字大火。後改葆中。次子毅中。小字辟惡。曾靜事起。用晦與葆中皆戮戶。毅中處斬。諸孫皆戍寧古塔。後以佗事又改發黑龍江。隸水師營。民國元年。余至齊齊哈爾。釋奠于用晦影堂。後裔多以塾師醫藥商販爲業。土人稱之曰老呂家。雖爲臺隸。求師者必于呂氏。諸犯官遣戍者必履其庭。故土人不敢輕。其後裔亦未嘗自屈也。初開原鐵嶺以外。皆故胡地。無讀書識字者。寧古塔

人知書。由方孝標後裔謫戍者開之。齊齊哈爾人知書。由呂用晦後裔謫戍者開之。至于今用夏變夷之功亦著矣。

嚴鴻逵者。歸安人。其譜稱鴻逵字賡臣。自號寒邨。順治廩貢生。烏程縣志稱鴻逵謀不軌。被逮至京。雍正八年。死于獄。鴻逵與嚴元照嚴可均爲一族。今其書尙有存者。則朱子文語纂編十四卷是。是書成于康熙戊戌。五十七年刻于庚子。五十九年自序稱成先師呂子未竟之緒。與邵陽車鼎豐商訂者也。按順治末至雍正七年曾靜獄興之歲。首尾六十九年。據清雍正七年諭。嚴鴻逵日記荒唐叛逆之語。自康熙五十五年至雍正六年。不勝枚舉。作何治罪之處。著速議具奏。是鴻逵是時固在也。其譜稱順治廩貢。則順治時必已弱冠。逮至雍正六年。年幾九十矣。一老禿翁。亦何能爲。尙與曾靜輩謀樹漢幟。殊不近情。恐譜有誤爾。

沈在寬籍貫不可考。清諭稱其雜志載沈崑銅杭純夫黃補菴詩。又有自著詩集。則當時詩人也。杭純夫詩言漫嗟邵聘同君直。又言痛哭錢唐原隰哀。黃補菴詩言聞說深山無甲子。可知雍正又三年。二子亦是時有志者。清旣不問。其事亦湮沒不傳。惜已。曾靜獄起。呂氏弟子蓋無子遺。而齊周華猶稱私淑。周華與召南爲兄弟行。乾隆中處死。召南亦以故左降。所著有名山藏。于清虜不甚詬厲。或更有佗書。

書梅伯言事

上元梅曾亮伯言善文章。能言政事。在清時官部郎。老歸其鄉。至今江蘇人言伯言嘗受洪氏尊禮爲三老五更。余觀吳敏樹爲伯言誄辭。以名高爲嘲。以卒於顛倒爲詬。因疑傳之者非無因。民國初。遇桐城馬其昶於京師。因問伯言事。其昶言。聞洪氏破金陵時。伯言不及走。爲所掠。令擔水。老不勝任。則厲聲誦詩以助力。見者怪之。良久知爲金陵尊宿。擔水之役得弛。其後仕洪氏以否。不敢知也。今歲余以事赴金陵。入其圖書館。見金陵儒先著述。檢得柏硯山房集。以館長鍾某爲金陵士族。因問伯言仕洪氏至三老五更信乎。鍾答曰。不敢質。然金陵城中積口相傳盡如是。且其始嘗應洪氏鄉試。中式舉人。後始至三老五更爾。余念清人言洪氏者指爲逆賊。故無敢實徵伯言事。然鄉里相傳無異口。是豈文字所能掩耶。伯言旣爲金陵耆舊。洪氏欲用則用之。必以鄉試中式延進。懼非其實。意者弛擔以後。即命爲三老五更耶。伯言先世本宣城人。移家南都。其聞引光間事。視他人爲切至。晚迫於洪氏。受其尊禮。亦自謂無損大節也。以伯言之才輔相新主。雖未足比於劉基陳遇。必不在宋濂陶安下。顧洪王非有太祖之略。虛致尊養。終不采納其言。而伯言亦老矣。以子孫爲累。則去之亦宜。按柏硯山房集。癸丑歲無文辭。續集乃錄其詩甚多。有癸丑春避地王墅村詩及六無歎。

是時猶未遇洪氏也。其借衣歎諸詩。則多重九前後作。又已去洪氏也。雜詠五首在夏時。則正處洪氏軍中。有云蛛網結牆隅。弋獲那可必。胡爲翺飛蟲。避定自投室。膠絲一罥挂。振羽空唧唧。又云飛蚊臥繞鬢。屢擱不可去。言爲人氣拘。如魚遭網布。君看帳外蛟。擾擾謀進路。方無人臥時。過此了不顧。大患在有身。小物亦可悟。此前一首爲被洪氏拘繫。後一首則已作老更。而他人欲緣以進身也。又有移家詩云庚桑俎豆非吾願。好伴魚樵作幸民。伯言在金陵一退老之郎官耳。非有民社之職。何故以庚桑俎豆爲言。則知移居者爲辭洪氏而歸。庚桑俎豆者指三老五更爲洪氏所尊事也。伯言出後。仍居王墅。故甲寅七月有王墅有警攜家赴鹽城詩。昔劉公輔明祖。禮貌甚至。然猶時歸括蒼。有大事則以書問計。伯言之歸王墅。其果與洪氏絕否。猶不可知也。自赴鹽城後。則託於南河總督楊以增。以訖於死。其於前事。即汲汲以文章自解。且其在南都不過數月。諱之甚易。癸丑諸詩疑有事後爲之者。若王右丞凝碧池口號。正爲免罪計。豈果在祿山時所作耶。由今觀之。伯言本算師梅定九裔。定九杜門習數。未嘗求聞達。而終以獻書自禱。其孫曰珏成者。少養於君。仕至都御史。然亦執方技以事上。不能以大儒節概責也。伯言挺然學於姬傳。以文行自飭。而姬傳亦故降臣姚文然後也。世宦虜朝。終身不敢言夷夏事。視戴名世輩。蓋有薰蕕之辨矣。伯言之受洪氏尊

禮。雖由羈致。然受之不辭。是明知虜非吾主。死節爲不足尙。視曾國藩之倫。以死力爲虜爪牙。迷以終身者。其相去豈不甚遠矣哉。假令守之不退。雖爲其父與師幹蠱可也。然以進退不恆。既去洪氏而復不能隱遯。寄食淮上。以媿辭自解免。所謂卒於顛倒者。蓋有之矣。然吳敏樹數親國藩。亦不足以詆伯言也。余謂清史傳伯言者。入之文苑。不如入之逆臣。清之逆。非中國之順歟。

書顧亭林軼事

亭林先生四十五歲往山東。七十歲歿於山西曲沃。中間遊歷北方諸部。歲無三月之淹。而所至未嘗匱乏。世多謂其墾田致富。近聞山西人言。亭林嘗得李自成窖金。因設票號。屬傳青主主之。始明時票號規則不善。亭林與青主更立新制。天下信從。以是饒於財用。清一代票號制度。皆亭林青主所創也。按先生五十三歲始置田地屋宇于章丘之大桑家莊。五十四歲出雁門關。與李天生等二十餘人鳩資墾荒于雁門之北。觀其每歲出游。輒返山東。至六十一歲尙有刈禾長白山下詩。是章丘之田爲其本業。雁門則以畏寒付人治之。其時當事尙遣人到南方求造水車水碾水磨者。則農事實未善也。竊意墾荒鈍事。非旦夕可以致富。雁門寒瘠。先生又不親督課。其經畫固有不周者。先生亦自言北方畜牧之獲。饒于耕耨。

使我有澤中千牛羊。則江南不足懷。是墾荒難效可知也。全紹衣爲神道表。稱先生負用世之略。不得一遂。而所至每小試之。墾田度地。屢致千金。夫其能致千金者。必其本數倍于千金。按熟田常率。歲息視本。無過百分之七八。章丘之田。本以土人謝長吉等負先生貲。以田爲償。此熟田也。假令歲息得二百金。則其田幾值三千金矣。墾荒之利。過於熟田。雁門之墾。以貸貲興之。其時赴官領荒。所費或少。然披草萊。立室廬。其費亦不可紀。假令三年而熟。歲息得二百金。其本亦在千金以上。自非素饒於財。又孰肯以重貲貸者。若章丘雁門二處得田甚少。計本甚薄。則亦無屢致千金之理也。然則發金置號之說。似非無因。按先生五十一歲至太原。始與青主相識。章丘雁門營田之事。乃在其後二三歲。則或發金在前。後乃以餘貲興農耳。至其行跡所到。輿馬輜重焜耀道上。而終無寇盜之害。世傳先生始創會黨規模。蓋亦實事。全紹衣請先生徧觀四方。其心耿耿未下。是則先生外以儒名。內有朱家劇孟之行。非多財亦不能然也。

書朱子春先生事

舅氏海鹽朱子春先生於吾母爲從父兄弟。弱冠善畫士女。復得儀徵阮氏所摹宋本列女傳。其圖顧愷之筆也。師其法則技益精。所學汎濫百家。然不善爲舉業。家世仕宦。遭兵禍中

落。數應鄉試。不中式。授書於家。貧益甚。性嗜飲。秋日門外有呼賣蟹者。欲買下酒。家人言錢已盡。先生叫且起。曰。河蟹老酒。雖典袴子。必取食之。方解袴。有求畫者。以錢五百易故畫去。遂取蟹飲終夕。其畫蓋值白金四兩也。余兒時侍先生。未十歲。今忽忽五十年。而先生沒亦四十餘年矣。觀其風物。阨窮不厭。以一醉飽適意。自余壯以來。未之見也。

書譚茶陵遺事

清故兩廣總督茶陵譚文勤公。嘗撫浙江。聽政未半歲。誅錢塘猾吏何秉仁。令所在納稅者悉自封投匱。毋得關胥吏。民有告折漕重者。令縣悉還民。復徵米。民大驩說。至今理財字民稱最焉。嘗恨織造虛費。欲與兩江合奏裁之。三織造皆大恐。欲行賂整公。知政府倚公專。而時新疆方議設行省。公便習西事。乃因內廷亟致公陝甘總督以去。前後在陝甘閩廣治迹皆過人。其奏議已詳矣。公未撫浙時。先以監察御史出知杭州府。捕斬土豪徐正魁。吏民盡肅。然尤哀無告。重士大夫。嘉興舉人鮑敏卿者。以受誣部令傳送京師。巡撫得牒。不知狀。錄敏卿以屬杭州府。敏卿至。則被琅當。貫三木。公遽問曰。已褫革耶。曰。未也。即命脫械。問所得何罪狀。敏卿亦不知。明日。省會諸名士饋糧藥者踵而至。公知其端人。直詣院請咨部問敏卿所犯。部以通梟匪覆。公召問敏卿。敏卿自列。素不與人事。種竹賦詩。安得識梟匪。復延諸

名士問狀。皆同辭。關問嘉興。亦不省也。公曰。敏卿與朝士有怨耶。敏卿言。家有舊宅。比鄰朱御史欲得之。以予直少。不肯鬻。此爲小怨耳。公復詣院請再咨部。問何因。知敏卿通臬匪。誰告敏卿者。部乃錄朝士奏事下浙江。奏事者果朱御史。朱御史者。故嘗出公門。乃詒書責讓之。而白巡撫釋敏卿。由是惠愛流于旁郡。其後擢河南按察使。將去杭州。民有槌鼓白大冤者。臨問。自陳台州人。弟以稗販處海甯。見誣爲盜。奉撫部令將誅矣。公白巡撫緩其事。而遣法吏之海甯。襍治。囚果異辭。公令送府。自臨治之。自朝至舖時。囚稱在海甯賣麻。桌碎物。莫夜見道旁有遺袍。持歸。其旦。捕役金阿奴窺吾門。即曳我去。以醞酢灌我鼻。炊許。氣幾絕。阿奴大聲言。某家遇盜。汝從我見州官。當自承盜首。此袍則贓也。不承者。醞酢復至矣。少頃。入州廷。猶稱冤。出。阿奴復以酢灌我。至再。遂誣服。後省遣法吏來。復異辭耳。今日見青天。請救命。公命逮阿奴來。與囚對。阿奴不伏。公笑曰。醞酢猶在。毋自及也。取酢灌阿奴鼻。炊許。阿奴始承誣盜狀。與囚辭同。即釋囚。置阿奴立籠上。未絕。代者至。杖阿奴遣之。公猶以爲恨云。及撫浙江。民以前事知公威惠。故令行如轉規。無所同異。其才在明周忱。况鍾間矣。公未開府時。文牘多不傳。遺事頗衆。家大人嘗與公游。而伯兄篋少在公門。長又更其幕府。故聞其一二也。民國九年十二月。餘杭章炳麟書。

書范光啟事

悲哉。桃源宋氏之變之劇也。其始不過求主大政。不獲。乃以他術箝制。主者梟雄不可劫。災遂逮身。而義故爭以抗命爲諒矣。雖隕身湛族。猶不悔也。如范光啓者。當清之末。嘗以清議忤當路矣。及兵起。又與攻拔金陵之役矣。此其志素堅定。非暫以赴義要名者。儲其用。老其材。以待人之惡孰可也。當宋氏變作時。袁世凱雖傾險爲謀主。其元首之號未去。非蒙外患內亂之罪。不得而譴之。徒以見微知著。故師雖無名。而志有可哀也。然謹名義負方略者。斯時宜伏以俟之矣。光啓篤于故舊。感憤所激。願與袁氏爭一夕之命。故入蕪湖。徇大通。窺潁州。將據淮上諸郡。以睨中原。所志未伸。而金陵潰。又去之安慶。亦敗走。名捕旣急。跳身下江。無絲髮之援。猶糾合義從。將乘間襲上海。卒爲姦人狙擊以死。吁。其可哀也。自光啓輩死逾年。袁氏果改號。而東南人物耗矣。討之者則蔡鏗。唐繼堯。陸榮廷。非素有瓜葛者也。光啓合肥人也。於皖北植根深。同志如龔振鵬輩。皆沉勇知軍事。不幸猝起。以至於敗。其窟穴遂不守。至於今。皖北亦無完宇。是孰令至是哉。丈夫謀大。行固有道。或以術取。即往往蹈危地。此宜以一身任之。毋牽率才俊以殉可也。雖然。氣於所至。誠有令人不皇審顧者。當宋氏致禍時。余未嘗與宋之謀也。聞變猶解官赴難。濡首而不恨。况如光啓兼人之質乎。光啓旣歿數

年。其女天德從余學。數囑余爲之傳。余於斯事。蓋太息不忍言。晚得劉文典所作行狀。爲略論其事。然未能道其什一也。民國二十三年章炳麟撰。

書黃君玉田事

雲南光復之緒。起會澤黃子和。余既粗述其事。又二年。其父黃君玉田亦歿。以狀來。知雲南諸志士所以保聚無後患者。亦由君任之也。君諱德潤。字玉田。其先江南產。從沐黔寧征元梁王。始居雲南。轉徙至會澤。遂家焉。君以清光緒十六年成進士。籤分四川。歷知渠彭萬郫雲陽銅梁江安諸縣。爲政廉。有聲。尤善折獄。以功擢道員。歷主官印局邊藏餉械局瀘州釐局。民國興。版署雲南司法司長。五年。護國軍起。復推督籌餉總局。其伐閱如此。余嘗過昆明。與君長子子實遊。時君已老。家既舊勳。又主東川銅礦。子弟皆樂施予。好賓客。爲一鄉宗。其鄉人言。君自通籍時。見清政窳敗。已有改革志。既從政四川。有楊維黃芳者。以謀革命被錄。爲婉言全之。及雲南光復。則子和功最多。以是爲主者尊信。袁氏得志。所摧殘民黨衆矣。每發一令。欲鈎致人。無內外皆爲盡力。威暨大荒。亡逃者無所竄。雲南雖僻左。顧勢蹙不敢方命。以君力。諸民黨得無死。卒成護國軍。至厝北廷。帝制摧衄。案狀皆合。其所以懷保善類者。非功之至歟。余因念改革以來。江湖嶺南之域。人士多拔起有功。然未有耆碩長者以蔭之。

旋多致死。存者亦渙散。至于乞食。失其宗故也。君仕四川幾二十年。官不過監司。未爲尊寵。其行事精明安肅。亦未有赫赫功。而能更歷興廢。膏潤一方。非其言行有以過人。固未能如是也。故樂爲書其事。若夫莅政治獄之美。則其家所狀備矣。民國九年春。餘杭章炳麟書。

書十九路軍禦日本事

民國二十年九月。日本軍陷瀋陽。旋攻吉林。下之。未幾又破黑龍江。關東三省皆陷。明年一月。復以海軍陸戰隊窺上海。樞府猶豫。未有以應也。二十八日夕。敵突犯閘北。我第十九路軍總指揮蔣光鼐軍長蔡廷鍇令旅長翁照垣直前要之。敵大潰。殺傷過當。其後敵復以軍艦環攻吳淞要塞。既擊毀其三矣。徐又以陸軍來。是時敵船械精利。數倍于我。發砲射擊十餘里。我軍無與相當者。要塞司令鄧振銓懼不敵。遽脫走。乃令副師長譚啟秀代之。照垣時往來閘北吳淞間。令軍士皆塹而處。出即散布。砲不能中。俟其近。乃以機關槍掃射之。彈無虛發。軍人又多善跳盪。時超出敵軍後。或在左右。敵不意我軍四面至。不盡殲即繳械。脫走者纔什一。卒不能逾我軍尺寸。始日本海軍陸戰隊近萬人。便衣隊亦三千人。後增陸軍萬餘人。數幾三萬。我軍亦略三萬。自一月二十八日至二月十六日。大戰三四。小戰不可紀。敵死傷八千餘人。而我軍死傷不逾千。自清光緒以來。與日本三遇。未有大捷如今者也。原其

制勝之道。誠由將帥果斷。東向死敵。發于至誠。亦以士卒奮厲。進退無不如節度。上下輯睦。能均勞逸。戰劇時。至五晝夜不臥。未嘗有怨言。故能以弱勝強。若從竈上埽除焉。初敵軍至上海。居民二百餘萬。惴恐無與爲計。聞捷。饋餉持橐纍纍而至。軍不病民。而糧秣自足。諸傷病赴醫院者。路人皆樂爲扶輿。至則醫師裹創施藥。自朝至夜半未嘗倦。其得人心如此。章炳麟曰。自民國初元至今。將帥勇于內爭。怯于禦外。民聞兵至。如避寇仇。今十九路軍赫然與強敵爭命。民之愛之。固其所也。余聞馮玉祥所部。長技與十九路軍多相似。使其應敵。亦足以制勝。惜乎以內爭散亡矣。統軍者慎之哉。民國二十一年二月十七日章炳麟書。

書宛溪翁事

蜀之錦。漢以來以爲利。其絮纒繒帛弗如。江海通。賓旅集。責絲者不之蜀而之下江。宛溪翁者。三臺諸生也。家素貧。賃人田而耕之。嘗讀書僧舍。見牆下有桑數株。問其值。僧具以告。喟然曰。治一經不達。又不能樹藝以自給。是惰游之民也。即歸就所賃田種桑。家人里黨皆笑之。不省。數年桑成。獲利自倍。即又賃田種桑至五百畝。奇羨益多。念販桑不如親殖蠶。殖蠶蠶就。積數歲。募資以機繅絲。自三臺始。其後又置之樂山。兩場南北相望。爲全蜀治絲者冠。家益富。其絲亦益布於海外。未三十年。蜀人爭相效者以千數。自中江以上。唯蜀產與吳越

間齊翁以七十三歲卒。蜀人偉其事。傳相告語。以聞於章炳麟。炳麟曰。昔武侯有成都八百株桑。使其子孫有餘饒。常道將亦言蜀好斑采。所從來遠矣。顧閱世久。民之好惡勤惰亦異。夫幽風記條桑。漢時齊有三服官。織作冰紈純麗之物。今關以西無植桑者。山東乃獨有柞繭。堪作縹耳。且蜀中所產布有黃潤者。其細不可見風。今亦無其物。獨蜀之蠶事未甚衰。然非苦心如翁者。猶不足以繼長增高。物之盛衰豈不以其人邪。聞翁以新術事蠶桑。不秘其道。有利亦時以分役人。積而能施。蓋得計倪之術者。其事宜書。且使幽齊之遺民聞焉。翁姓陳氏。名開。趙熙爲之傳。宋育仁志其墓。其家世行事已備。不盡書。

書長沙張母事

長沙張母者。同縣徐氏女。年三十六。歸張公春亭。而張公亦以五十始婚。相處穆如。不厭其晚也。徐氏於長沙爲望族。尊長皆仕清。至京朝大官。而張公少出塞。爲人販茶。絕流沙。踐天山。更二十年。持鉅萬以報主人。銖黍未嘗有所私。家居衣裘輿馬不能甚鮮明。婚之夕。帷帳不過中人。不憂其貧也。張公同產三人。其季最雄。能綱紀一方。張公卒而母與羣叔異財。姑歿。季治喪獨厚。母請三家分任之。賣田宅以資季。不憾其奢也。母少時讀書。矜禮法。旣適張氏。日夜作勞。猶不廢學。有子時俊。生三歲而孤。爲口授論語毛詩。章句旣通。必示以旨要。倍

文少誤。即操筆從之。未嘗假辭色。稍長。親傳事師。無敢不腆。或諷以廢書治生者。則曰。貧何害。禮義不可缺也。時俊以是厲學。既壯。從軍。已而出榆關。任艦隊書記軍需諸職。以是致養家。稍給。母性好施。振人不盡力不已。然不肯苟受人惠。客或爲鄰人捕魚。私取二尾。致廚閒。欲以導意。母見之。謂家人曰。魚鄰物也。鄰不饋我魚。我食之不義。卻之又傷客心。宜瘞之。即埋置圃中。鄉里以是感其德信。諸偷兒爲避其門。里有強刳者。桀黠張甚。人莫敢近。母常厚賙之。其人感激。自是遂改行。此二事。雖晉陶母漢王彥方所行無以過也。初時俊既從軍。母時致手書。教之忠於職事。後在海軍。不數得定省。而母年八十二矣。以庸行不爲世人矜異。又不敢蔽其親之善。自威海衛二千里遺書屬余。識其事。既繕定。則語之曰。以德化人。可謂至行矣。貴而能貧。壯而能事人。可謂盡人道之紀矣。若是者。其名往往不能越里黨。矜式之亦不至。顧前史傳列女。不純取瑰意琦節。晚世乃務以烈相高。故諸恆德在人者。事狀不過在方志。其次在譜牒。是亦國史之失已。然猶幸有一二著者。足以爲後人儀法。余之書此。蓋以補采風之遺爾。抑余以爲德之盛者。頌聲疊疊在人口耳間。有貴乎書者也。

書宜黃許貞女事

許貞女名蓮芳。江西宜黃人。年二十二許嫁廣東顏鍾遇。顏生有文學。未成禮。顏生歿。女與

父守貞書。誓不嫁。今四十六年矣。時時作詩樂府以見志。題曰芸窻小草。頗效李供奉語。甚似。然未嘗妄下筆也。自明歸氏著論。以爲夫婦之義成於合卺。故未嫁不得自專。余謂禮以定中庸之則。使凡庶可企而致。所不責者微特未嫁夫死而已。雖與人處室有子死而倍之。復適人者。禮亦無所禁。苟言其極。昏禮至納徵受其聘幣。結纓以示有屬。既許爲伉儷矣。死而不渝則宜。觀貞女所爲樂府。於顏生遺畫及其宅兆數致意。斯情發於中者。固非以爲名也。今世衰。夫婦道苦。聞其事。或笑以爲愚。斯又何足辨耶。貞女處杭縣留下。去余所居不過二十里。然未得知其名。南昌邵祖平以爲言。始志之。民國二十三年十二月餘。杭章炳麟。

太炎文錄續編卷六下

章氏叢書三編

西南屬夷小記

今人通稱雲南曰滇。滇乃其東偏一部耳。蜀漢時則稱南中。于古則稱濮。周書王會。伊尹爲四方獻令曰。正南百濮。尙書牧誓。有庸蜀羌髻微盧彭濮人。春秋傳云。巴濮楚鄧。吾南土也。杜氏釋例。建寧郡南有濮夷。無君長總統。各以邑落自聚。建寧本漢益州郡。蜀漢始改益州爲建寧。是雲南稱濮之證。陳氏蜀志李恢傳。恢爲康降都督。賦出叟濮耕牛戰馬。金銀犀革充繼軍資。常璩南中志。建寧郡談藁縣有濮獠。永昌郡有閩濮。與古郡多鳩獠濮。是漢晉時並稱雲南夷種爲濮矣。濮之得名。蓋因於濮水。猶因天齊以命齊。因晉水以命晉。因荆山以命荆也。漢地理志。越巂郡青蛉。僕水出徼外。東南至來唯入勞。過郡二。行千八百八十里。益州郡葉榆。貪水首受青蛉。南至邪龍入僕。行五百里。來唯。勞水出徼外。東至麓冷入南海。過郡三。行三千五百六十里。依今水道。僕水即河底江。東源出雲南縣梁山。西源出趙州南山。合東南流至于元江。又東南至河口。出交趾。稱富良江。入于南海。是爲雲南中部之水。源遠而流長。與北部金沙江西部瀾滄江怒江相擬。故其地以僕水得百濮名。其西及永昌東

連貴州廣西者。亦悉稱濮。猶荆得名本荆山。其後北及南陽。南邛邛桂。皆稱荆州部也。地言百濮。而種人亦受是名。猶蠻荆山越以地名其種也。于北金沙江之岸。在漢時曰越巂。于南瀾滄江之下流。在殷周曰產里。車里。亦同受百濮名。而或自有其號。說見後。要之雲南舊種皆濮也。說文人部有夔字。云憊爲蠻夷也。憊爲本與南中連界。其治曰夔道。所屬堂琅。則雲南之東川。大要清時敘州嘉定眉州資州昭通東川四府二州皆其地。太史西南夷傳。說楚莊躋王滇秦常頰通五尺道以後。漢興。皆棄此國。開蜀故徼。巴蜀民或竊出商賈。取其犴馬夔僮旄牛。司馬相如傳。唐蒙使略通夜郎西夔中。此皆專指憊爲。相如檄言。南夷之君。西夔之長。疑不專係一郡矣。今雲南蠻種最大者。在西謂之百夷。在東謂之爨夷。爨夷偏于曲靖。大族有釧姓者。爨氏之正適也。百夷在順寧永昌南及普洱。而緬甸暹羅皆其族。顧氏天下郡國利病書。師氏滇繫。皆謂夔之音誤爲百。余以爲湯武之世已有濮名。春秋傳亦言濮。無言夔者。呂氏恃君覽乃始言夔人。夔之爲字。疑因濮轉聲而造。爾雅釋地。南至於濮鉛。卽爲南極。夷聲轉鉛。故爲濮鉛。濮聲轉百。故爲百夷。本之一濮夷也。時閱今古。言音譌變。不知夔語所自來。郭義恭廣志。說有五濮。曰木緜濮。文面濮。折腰濮。赤口濮。黑夔濮。見御覽四夷部引。唐南蠻傳因之。謂在雲南徼外千五百里。旣以夔濮累言矣。李元陽顧祖禹洪亮吉又皆以順寧蒲

蠻爲濮人。顧炎武師範述其遷徙之迹尤詳。其言曰。百濮本在永昌徼外。誤濮爲蒲。有以名其地者。若蒲縹蒲干之類是也。永昌鳳谿施畦皆其種。勤力耕鋤。徒跣登山。舊時有事。多資其力。今漸弱而貧。其流入新興祿豐阿迷鎮南者。形質純黑。不畏深淵。能浮以渡。在蒙自及教化三部十八砦。皆號野蒲。頭作架驚甚諸夷。在景東者。淳朴務農。在順寧沿瀾滄江居者。號普蠻。亦曰樸子蠻。性尤悍惡。崑爲盜賊。不鞍而騎。馳突迅疾。善用槍弩。二家所言蒲人。皆與百夷少異。然又言百夷種出黑水之外。則與百濮在永昌徼外者同地。明清職貢。永昌順寧皆貢濮竹。而順寧專貢矮犬。與王會百濮獻短狗相契。以音讀之。蒲普皆與濮近。而樸子蠻與濮尤近。樸子蠻唐時有其名。御覽四夷部引南夷志曰。樸子蠻勇悍捷。以青婆羅段爲通身。其種並是。宜于。然濮轉爲夔。于雙聲亦切。則疑古者通稱爲濮。秦漢以降。又以其小別分之。若者言濮。若者言夔。于是漢之夔人。局于犍爲十二縣。其專稱夔道者。局于今之宜賓南谿屏山諸縣。而說濮者。多指永昌建寧。則自東以昭通而外。盡雲南皆濮種。今質以武王伐紂諸蠻。慕義從者。有濮無夔。若濮夔必異者。何故遠者先從。近者獨沮。又質以元地理志。其于雲南種人。有言夔無言濮者。安有濮種盡滅。而夔人偏盛者也。故知濮爲初語。夔爲後造。猶閩之變爲驢。夔之變爲棟。語其字則一音而小殊。語其物則一類而小別也。鄭語。荊子

熊嚴生子叔熊逃難於濮而蠻。又云。楚蚡冒於是乎啟濮。是濮地嘗爲楚附屬。莊蹻王滇。亦因其故迹也。楚之疆土。其始不過西至巫山。稍南亦有五谿地耳。其去建寧永昌甚遠。逃濮啓濮。蓋道巴溯江入金沙江。以逮雲南北部。未能盡百濮之地也。春秋傳。又有麋人率百濮聚於選。將伐楚。麋在今鄖陽。去雲南亦甚遠。疑其時百濮之種已突入貴州四川以東。左思蜀都賦。於東則左綿巴中。百濮所充。劉逵注。濮。夷也。傳曰。麋人率百濮。今巴中七姓有濮也。常氏巴志。其處有濮。資。共。奴。濮。夷。蠻。之。蠻。是。說。百。濮。入。巴。之。事。觀。是。役。巴。人。出。師。從。楚。蓋百濮通麋。必侵軼巴地乃得達。故巴人與楚同憂也。

雲南漢人全部語言皆相似。蓋沐西平所携淮兵甚多。又迫其土人作江淮語。久之。蜀人南遷者稍衆。故其語與蜀相似也。近聞雲南人言。西南百夷人語與漢特異。而與福建語同者十有二三。余頗怪兩地相距七千餘里。不應相會。檢南中志。永昌郡有閩濮鳩獠。獠越裸濮身毒之民。晉元康末。呂凱之孫爲永昌太守。值南夷作亂。閩濮反。乃南移永壽。譔曰。南域處邛笮五夷之表。不毛閩濮之鄉。固九服之外也。云云。乃知雲南西境自有閩濮。宜其與福建土人種類相似。按夏官職方氏稱四夷八蠻七閩九貉五戎六狄之人民。閩類有七。則知爲南夷通名。故鄭注云。閩蠻之別也。亦不專指東南濱海者言。漢之閩越。即今福建。此特閩之一種耳。鄭語。華姓夔越不足命也。蠻。華。蠻。矣。韋解。蠻。華。謂叔熊在濮。從蠻俗。按蠻。華。蠻。矣。職

方注引作閩半蠻矣。稱閩半者。正謂半姓竄在閩濮。然則西南有閩。自周時已言之。其與東南之閩蓋大類同而小別異。故語言有與福建相似者也。

中國人種。本起秦嶺以南隴西蜀滇之邊。比於北者本西羌之種。比於南者本髡濮之種。合種而為夏人。後漢書西羌傳云。西羌本姜姓之別。謂本在商。春秋所謂姜戎。亦其類也。其實

姜姓出於西羌。非西羌出於姜姓。神農姜姓。由姜水也。其原本西羌。而黃帝與之同出少典。則亦西羌種也。高陽起於若水。高辛起於江水。此西羌與髡濮合種也。江水為岷江不待論。

若水近代皆以打沖河充之。疑未足當。依漢地理志則金沙江稱繩水。然繩水名始於漢。若水則周時已為大名。太史司馬相如傳。西至沫若水。張揖曰。若水出旄牛徼外。至犍道。今宜

入江。是即以若水為金沙江。淮南地形訓云。海人生若菌。若菌生聖人。聖人生庶人。伊尹獻令。正南之國。九菌與產里百濮並言。蓋部族大類為濮。其支系南在瀾滄江下流與交趾鄰者曰產里。北在金沙江之隩與建昌鄰者曰九菌。九菌即若菌。菌指其種。西南夷稱人曰菌。見後漢書西南夷傳。

傳及。若指其地。是為濮種小宗之民。漢越。郡有會無縣。今為會理縣。正臨金沙江。常民蜀志云。會無故濮人邑也。今有濮人家。家不開戶。是若菌亦濮矣。

若菌生聖人。即指黃帝子昌意降居若水娶蜀山氏女昌濮氏而生高陽也。大戴禮帝繫作昌。漢史記五帝本紀

帝繫稱昌。漢氏。猶春秋書子氏。姜氏也。周衰。唯楚與巴通。叔熊蚡冒因之以啓濮疆。其時濮

種徧滿雲南。稍東北及於貴州四川。今貴州蠻人語。侏離者固多矣。而亦或與古語相類。田

雲黔書謂夷語稱父曰拔。亦曰罷。按此正當作爸。曰包。或曰索。按廣雅釋親。叟。父也。索即叟之轉。稱母曰米。亦曰蔑。

曰蒙。曰明。一音之轉。稱祖曰大。按此正當作爹。廣雅釋親。爹。父也。曹憲音大可反。今浙西亦有此語。稱牛曰擬。稱雞曰介。稱豕曰拜。亦

曰巴。按此正當作罷。此正攷方言者所當知也。

羌之種類亦不專在先零。南中志云。諸葛亮平四郡。移南中勁卒青羌萬餘家於蜀。為五部。

所當無前。號為飛軍。按張儼記亮表云。突將無前。實叟青羌散騎武騎一千餘人。此皆數十

年之內所糾合四方之精銳。讀常志。乃知青羌出於南中。非隴右雜處之羌也。大抵青海吐

蕃。本皆西羌種類。由吐蕃而入滇邊。故南中得有青羌。自唐至明。言雲南屬夷者。無青羌名。

然唐時所謂磨些蠻。即羌種流入者。顧氏天下郡國利病書錄黃直指所記屬夷種人。有曰

西番者。居永寧北勝浪渠。凡在金沙江北者皆是。俗尚勇力。善射。性最暴悍。隨畜移徙。有曰

古宗者。西番之別種。滇之西北與吐蕃接壤。流入境內。麗江鶴慶皆間有之。此二種者。男子

皆辮髮披氍。疑即常氏所謂青羌。師氏滇繫又言順寧所屬有巴苴者。亦名西番。元世祖取

滇時。從以來。不知蒙古何部落人。男挽總髻。耳帶銅環。由今觀之。此亦氏羌類也。又書偽孔

傳云。蜀叟也。南中志。夷人大種曰昆。小種曰叟。皆曲項木耳。環鐵裹結。漢中志。武都郡有麻

田氏叟。陰平郡多氏叟。按後漢書劉焉傳。馬騰謀誅李傕。焉遣叟兵五千助之。蜀志劉璋傳。璋送叟兵三百人於曹公。張疑傳。越巂郡自丞相亮討高定之後。叟夷數反。常志言漢元封二年。叟反。遣將軍打昌討平之。因開爲郡。號曰益州。先主薨後。越巂叟帥高定又舉郡稱王以叛。雍闓使建寧孟獲說夷叟。晉元康八年。略陽天水六郡民李特等及氏叟青叟數萬家就穀入漢川。是叟類蜀越巂建寧武都陰平略陽天水皆有之。是亦古之氏羌。而今逸其名者也。

蠻人進化有後先。而夏人亦或與蠻同化。叔熊之從蠻俗。是夏人與蠻同化也。莊蹻王滇。楚將士留者多矣。太史西南夷傳稱楚之先有天祿。秦滅諸侯。唯楚苗裔尙有滇王。漢誅西南夷。國多滅矣。唯滇復爲寵王。是滇王嘗羌爲莊蹻後。漢已開郡。猶未替其位號也。又云。滇王與勞浸靡莫皆同姓相扶。是莊蹻後非一國也。以其同化于滇。則蠻夷視之爾。楊慎滇載記。乃謂漢時有白仁果。強大。居昆彌川。傳十七世至龍祐那。武侯南征。賜姓張氏。邵遠平續宏簡錄謂漢武惡滇王不遜。因册天竺白飯王後名仁果者爲滇王。其言與西南夷傳悖。且天竺至滇。中隔憐國。今編哀牢。昆明諸部。故漢使求身毒。滇王嘗羌留爲求道。皆閉昆明莫能通。又焉得以白飯王後主滇也。南中志所云永昌有身毒之民者。即指憐國。蓋憐爲永昌附屬。蠻夷也。然未開不章以前。此則爲哀牢。憐國非哀牢之屬。則身毒種尙不

得王真年。依慎所述。其言出雲南舊家白古通玄峯年運志。書用爨文。此蓋稗官雜錄之書。南中信佛。故以釋典附會成之。非實事也。世所稱白蠻者。與烏蠻分別爲言。其始但以衣之白黑辨耳。何與天竺白飯王事耶。白蠻之與百夷。其得名不同。唐時稱東爨烏蠻。西爨白蠻。是爲爨夷。非百夷也。

今之昆明。在雲南省會。唐之昆明。在今四川鹽源縣。陳志。李恢案道向建寧。被圍於昆明。出擊。大破之。追奔逐北。南至槃江。東接牂柯。則昆明在建寧東南。皆非漢之昆明也。西南夷傳。明言北至葉榆。名爲嶠昆明。則嶠昆明必近今大理。嶠非即越嶲。昆明亦非今之鹽源。以漢造昆明池。教戰攷之。其地必多湖澤。今大理有洱海。稍西北則鄧川有西湖。劍川有劍湖。此皆漢葉榆縣。則前此皆昆明地。其所謂嶠者。則漢所改置之嶠唐縣。今雲龍是也。要之金沙江以外。瀾江以內。清時大理七屬。並嶠昆明故壤也。

游趵突泉記

歷下稱七十二泉。皆濟水之踊於地者也。而趵突泉爲勝。其水坳地十有餘尺。噴沫若霧。廣袤四五丈。蓋春秋所謂華泉。近人以鐵筒導之。水踊稍緩。而旁衍亦廣矣。民國二十一年五月。余自北平來。臨流求飲。啜數勺。甘潤不絕於口。信乎泉之至美者也。飲既畢。峙踏亭上。追

華泉舊事。下車取飲。嘉丑父之忠。抽戈冒身。念齊侯之勇。嗟乎。君臣相與。其誠如此。故能敗而復振。返汝陽之田也。今之統軍者。方其得志滿意時。揚眉叱咤。若無餘人。及兵敗國蹙。求一騶卒與之戮力。且不可得。豈非以狙詐遇人。無赤心之效耶。然則斯泉之在載籍。二千五百年於茲。豈徒以水之芳冽名。蓋亦以其人焉。後之柄國者。其亦取鑒於斯。章炳麟記。

三界重建水閣記

市廛之所聚。中其市立觀臺亭閣以統之。周官謂之次。司市之職曰。上旌于思次。以令市。市師泄焉。而聽大治大訟。胥師賈師泄于介次。而聽小次小訟。說曰。次。市中候樓也。思次。若今市亭也。介次。市亭之屬別小者也。行旅之所出。當其交爲傳舍以頓止之。周官謂之路室候館。遺人之職曰。凡國野之道。十里有廬。廬有飲食。三十里有宿。宿有路室。路室有委。五十里有市。市有候館。候館有積。說曰。廬。若今野候有庠也。宿。若今亭有室也。候館。樓可以觀望者也。路室。候館之制。魏晉間謂之官攤。時議者以爲官攤拘局。不如聽民置客舍便。次之制。晉以下絕。晚世民間。乃稍稍自爲之。要之不離周官之遺法云。嶧縣三界鎮者。東濱剡谿。西望南鎮會稽之山。爲紹興上虞寧波孔道。船艦任輦。日夜轉轂。市居殆千家。邸店連比。而道亦湫隘。直東置水閣。祀北斗魁星其上。與北面戴星樓祀水官者相望。以厭火災。不知所自起。

民國十五年四月。市居火。延燒幾盡。水閣祀北斗魁者亦災。民失業露宿。相枕于道。前選拔貢生金元瑞。以其母命倡議急振。與鄉里好義者集資得銀幣二千五百版。又具狀告省公署及七縣同鄉會在上海者。省發幣三千版。同鄉會亦彙以二千版。裹糧而給。民得以全。然闕闕未就也。元瑞度得幣三萬版。市可就。以其圖略告于衆。無適任者。乃自以三萬版貸。界畫其地。令故主各自占識之。約事既就。則故主僦其舍以居。以十年之租庚償。償盡即自主。議既定。于是屬匠庸。具章材。易道路。仍溝瀆。定廩舍。數月而功就。其道之迂左者。與其迫陝不容水具者。繩之拓之。過其舊遠甚。自水閣之毀。鄉人以形法家言。謂無以禦不祥。市既成。咨于元瑞。元瑞亦念古者市樓候館之法。不重建則居者無以會。行者無以息。即斥幣五千版。爲閣三重。以其上奉舊祀。其中連謬五楹。曲折上行與閣通。以集市之議大事者。而歲時父老得以容宴豆。有警得以瞭視。有大賓客得以登而觀其肆之行列。其下以止行旅。冬有溫室。夏有涼蔭。負擔于是息。簞笠于是解。役不告勞。主不慫賓。所以興廢也。初縣西萬金隄爲水所齧。崩。元瑞嘗完復之。至是又定三界市。云。元瑞既安集其人。而又爲之保息之所。市人大喜過其望。皆曰。金君之功。足以配斗魁。度其像樓上。以酬德也。元瑞字憲章。父曰江蘇候補知縣昌運。素任卹。余旣爲銘其墓。母裘太夫人好施如其父。于是民國十九年秋。其鄉

人以事告。余以爲金氏之德。非獨在一時。其于三界。功亦不獨在建閣。以古者司市遺人之官。旣廢。而其事獨委之于鄉之長者。其隆替之迹可尋也。故書以刻石。署曰三界重建水閣記。

湖州機業公會碑

清時自江而南。置三織造官。曰江寧。蘇州。杭州。湖州于浙江爲支郡。尤善食蠶。以織縐紗名。縐紗者。古之縠也。世亦稱湖縐。而機師不隸織造官。自買絲織作。然猶以其帛鬻于商。商十
七家。賤斂而貴發之。每斂輒置熅火炕其帛。一端之重。減三四兩所。而機師不得以其物遠
販。商或遠販不利。又強以帛卻歸之。朋黨糾結。不可刮砭。清光緒中。城北張蘭波與機師交
市。得其情。與其友凌廷枚。陳雲。江鮑馥泉。及機師錢大亨。臧維椿等。始置公所。以縐紗販境
外。此二三歲。請于官。官受商人言。不許。上請省中。大吏亦不許。且禁設公所。逐蘭坡去。時有
張薇莊。爲委曲達其情于省。再數歲。始踣禁碑。機師稍稍自遂矣。于是摘十七家陵侮狀。懇
之省。省令縣集兩造坐質。十七家商不官來。機師分部赴省縣。直朔望。持香炷。照長官前。陳
述。亦不省。其後求得十七家侵蝕簿證。寫送部省縣。部省各遣吏來治之。始禁諸商火炕。令
機師得報捐遠販。于是就塔下街起機業公所。兼設學以教機師子弟。訖今蓋三十年。二張

凌陳錢諸子皆歿。則李恢伯張旭人主之。改號機業公會。稱湖州者。仍清時舊名也。以其始謀之不易。將植碑以詔久遠。余按古者大約劑書于宗彝。小約劑書于丹圖。周召鼎有賈絲自贖事。其徵也。今機業事雖細。然其造端亦已勤矣。書以刻石。亦古宗彝之類爾。

張督師祠記

四

餘杭倉前有張老相公祠。傳爲潮神。云以夏正三月六日生。去倉前四五里。又有祠數所。顧不知張老相公何神也。或曰。宋少保張公世傑是。嘗疑少保功烈在崖山。明中葉。嘗就江門建祠祀之。浙江無與焉。民國十五年春。過南屏山。謁明督師兵部尙書蒼水張公墓。問守墓者。督師支族嘗有來墓祭者乎。答言。歲歲有之。其謁墓常以三月六日。乃知張老相公即指督師。清時諱言之。故託以宋張少保。謂其忠相似。其傳爲潮神者。督師絕命詩有云。他日素車江畔路。怒濤豈必盡鷗夷。亦有由而然也。自明之亡。遺民祭其君臣者不可勝記。而皆匿其正名。祀忠宗者或稱朱天君。或託以日。皆其例已。督師本起翁洲。後與鄭延平同圍南都。別徇皖南。下二十四縣。其就義亦在浙江會城。杭人哀思。常以炙雞絮酒酌墓下。不絕。其祠祀在浙。宜也。舊榜稱英濟侯。無所據。大氏有諱辭。今爲更正曰張督師祠。祠亦有夫人像。按督師夫人董氏。子曰萬祺。皆先督師三日就義鎮江。夫婦皆著忠烈。其配享非徒然。督師本

生萬曆四十八年六月九日。今三月六日謁墓者。蓋因近清明。云生日者亦誤也。督師事狀見全祖望所作神道碑。智勇忠勳不可殫述。今但記祠祀本末如此。中華民國十六年春。勳一位前東三省籌邊使章炳麟記。

童師長祠堂記

出杭縣西郭。南有錢王祠。樹宋臣所爲表忠觀碑。迤北得寶石山。山以落星石名。亦吳越舊封也。浙江故第一師師長寧海童君。少以幹鬪聞於軍中。初舉大義。君實爲幹魁。其後拒袁氏帝制。走其幸將。功亦第一。不幸而夭。部曲懷之。民國十二年六月。則爲君起祠於寶石山。而以刻石訪於炳麟。按君初起。裁主陸軍警察耳。年二十五。直武昌倡義。下江響震。浙中志士謀應之。未敢發。君陰戒軍警出不意。攻清巡撫部院。縛巡撫增韞以來。諸君皆縉俟命。旋推君爲浙江臨時都督。受之。約束既定。自以年少望輕。不任爲主帥。以讓山陰湯君。而身退爲其參謀。浙軍攻江寧。復佐軍長朱瑞爲參謀長。未逾月。克之。民國既建。累遷至第十二旅旅長。五年。袁氏稱號。君以國本不可動。先事率將佐詣軍府請拒命。時朱瑞已爲將軍。佞袁氏。不能用也。頃之。西南護國軍起。露檄至浙江。衆大譁。復就君謀。會瑞病臥軍府。以短兵突之。衛士皆放杖。瑞逃。死於上海。事定。君當主軍事。猶以年少退處第六師師長。改浙江第一

師師長。出屯吳興。自民國初萌芽以至是歲。君比有大功。不以自伐。而策勳亦不及君。君亦欲自老其材。爲東南植。卒未嘗有怨悔。六年。以長官令耀兵於鄞。明年。又以長官令出師廈門。西略廣東至饒平。時以爲有功。授勳四位。予二等寶光大綬嘉禾章。君獨鬱鬱自傷。志不就。明年五月。歿於廈門軍中。歿四年而立祠。炳麟於是系之曰。浙人以布衣芟大難者三矣。首富春孫桓王。次長城陳氏。而臨安錢氏爲其下。錢氏以龔董昌功。世撫杭越。常附會北朝。與其鄰江南構兵。江南亡。錢氏亦納土。斯蓋昧於善鄰之道。志脆助寡。迫而爲陪屬。猥以表忠加之。謾矣。君起偏裨。奮其馮震。卒攘東胡。恢復疆理。直袁氏疆衛。再起與之爭命。視錢氏爲難能。中遭頓挫。不能以其材遠至。惜夫。浙之祀君。義也。其建祠寶石山與錢氏舊物並處者。地制之也。若夫表忠之義。君蓋深尤之。且非君部曲之志也。

芷江劉公祠堂記

洪氏時。翼王石大開與羣帥不合。率其衆自安慶西上。連行二千里。無敢留者。到芷江。遠府治十里。以三十萬人陳於楊谿。沅人兇懼。邑長者劉公徇於衆曰。師速而疾。略也。吾當以團練一戰却之。從之。大開果解而去。未幾。貴州苗亂。並清水而下。芷江潰。公又以團練破苗於託口。沅靖得全。清大帥席寶田聞其名。檄召爲營官。拒之。獨盡力治團。以餘力易道路。通河

渠舉常平。育孤遺。凡利於茫人者無弗爲。病者予藥。貧者予財。爭者曉以義。驛者臨以威。其誠足以感人。其力足以禁暴。卒未嘗受清一官。公諱登舉。始以田畜致富。事父母以孝聞。昆弟羣從七人。皆依以立。及分財。擇取其薄者。又出所得課諸從子讀書。治家樸勤。童子不衣帛。成人不坐食。春秋耕刈。即率家人集田間操作。農事畢。使丈夫婦人各趣其事。以是刑家而化一鄉。無子。以兄之子開洸爲嗣。開洸少從公治戎。未嘗學也。有子七歲。公使就外傳。取大學義名之曰治齊。常勅以孝友忠恕勤廉之道。且謂開洸曰。是兒力學。佗日當大吾門。卽爲吾起祠堂。當以吾名榜之。毋諱。年七十三。以清光緒三十二年十月卒。當清與洪氏交爭時。湘軍功最盛。然多起衡湘間。西部獨楊岳斌一人。餘無著者。觀公所爲。知奇才之士。遺逸亦衆矣。平生才行似漢末田疇。然疇纔爲大軍鄉導。且魏武兵素盛。其破烏丸。非疇一人之力。今以孤城白徒。當大開銳師三十萬人。其難有過於疇者。退而不伐其能。其高節與疇等比矣。同時上下江舉團練者。曾國藩功雖高。祇爲虜用。非義也。苗沛霖誓不服胡人。翎頂。猶豫受官。卒而反之。非信也。如公者。庶幾踐其中道者歟。治齊長從黃興宋教仁謀光復事。民國興。官至柳江道尹。卒爲公起祠。命曰登舉廬。從遺教也。君子正其名曰劉公祠堂。長老稱公禮也。

高橋杜氏祠堂記

杜之先出於帝堯。夏時有劉彙。及周封於杜。爲杜伯。其子隰叔違難於周。適晉而爲范氏。范氏支子在秦者復爲劉。以啓漢家。故杜也。范也。劉也。皆同出也。杜氏在漢世有御史大夫周始。自南陽徙茂陵。自是至唐世爲九望。其八皆祖御史大夫。唯在濮陽者祖七國時杜赫。自江以南無聞焉。宋世有祁公衍。實家山陰。江南之杜自是始著也。高橋者上海浦東之鄉也。杜氏宅其地。蓋不知幾何世。其畧郡猶曰京兆。末孫鏞自寒微起。爲任俠。以討祿寇有安集上海功。江南北豪傑皆宗之。始就高橋建祠堂。祀其父祖以上。同堂異室之制。近世雖至尊猶然。故諸士庶不別立廟。獨爲一堂。以昭穆叙羣主。蓋通制然也。凡祠堂爲阼。八畝。其墀地以待設塾及圖書館。所以流世澤。率後昆也。余處上海久。與鏞習識。祠成而鏞請爲之記。夫祠堂者。上以具歲時之享。下使子孫瞻焉。以裊致其室家者也。杜氏在漢唐。其爲卿相者以十數。盛矣。上推至於帝堯。又彌盛矣。雖然。自堯之盛。尙不能覆露其子。使襲大寶。其餘雖登公輔。賜湯沐之邑。曾微百年。後之人至不能指其先世里居所在。此鏞所知也。爲子孫者。豈不在於自振拔乎哉。和以處宗族。勤以長地材。福倍漢唐盛時可也。其兄弟不輯。其居處日媮。禍倍矜寡。無告可也。抑聞之古之訓言。保姓受氏以守宗祧。世不絕祀。不可謂不朽。稱不

朽者唯立德立功立言。宜追觀杜氏之先。立德莫如大司空林。立功莫如當陽侯預。立言莫如岐公佑。其取法非遠也。鑿往以討賊有功。其當益崇明德。爲後世程法。然後課以道藝。使就其文質。化其畔諺。以企於古之立言者。有是三者。而濟以和宗族。勤地材。則於守其宗祊也何有。不然。昔之九望。奄然泯沒於今者七八矣。雖有丹楹之廟。窮九州之美味之饗。其足以傳嗣者幾何。吁。可畏也。乃記之云爾。

瑞安姚氏家廟記

瑞安讓金邨姚氏。其郡望曰吳興。宋建炎時有諱朝野者。充温州通判。仍世貴顯。因家於永嘉。及明清間。有諱曾一者。始居瑞安四十一都。迄今幾三百歲。世譜略具。未有以藏其主祊者。耳孫用鴻以廢居起其家。始即讓金邨爲家廟。以諱曾一者爲別子。次自高曾而下。昭穆以班。不祀通判君者。中隔元明三百六十餘歲。世系闕絕。序列不可知。故斷從遷瑞安者始也。近世譜牒往往能遠徵五帝以逮商周建國。顧於漢唐多闕。其詳者不過起五季。而世次猶多跳脫。亦非獨姚氏。又尋王僧儒賈執所筭譜錄。一姓或十餘望。近世顧以一望攝之。斯乃依附明代俗書。非其實也。獨姚氏署吳興爲審。案唐韻載姚氏有吳興南安二望。南安望其徵。林氏姓纂鄧氏姓氏書辨證皆不錄。其可知者曰姚氏出虞帝。其後陳敬仲奔齊爲田

氏。至王莽封田豐爲世睦侯。奉敬仲祀。豐子恢避莽亂。過江居吳郡。改氏曰嬀。五世孫敷復改氏姚。居吳興武康。生信。仕吳。至選曹尚書。自是吳興之望始著。唐姚梁公之先亦自吳興遷陝郡焉。其在江南者皆自吳興而別也。故瑞安譜猶稱吳興姚氏。初姚氏在清世多勤稼穡。未嘗有達者。及用鴻以商致饒。先爲其鄉就養。止小學。其二子卒業中外大學。出身致用。文武之道彬彬矣。年七十始營家廟。又就廟立姚氏義學。以田百畝之入爲其歲費。蓋將上繼通判君之志。使子孫世食其德也。今世家廟與古異。古者鬼神各專其廟。棟宇裝麗。祝史承事者又繁。財力易屈。故雖列卿祀。不過曾祖。晉以下。或爲同堂異室。又簡。即異几筵。事神不必宗祝。饋食不必牲牢。易於立具。然庶人之祀。猶不得過祖禰。明嘉靖中始令庶人祀及四世。其後。縣世久遠。主祀攢積。亦不能異几筵。皆以其主合食於太祖。蓋猶古之祧而已。非廟制也。及夫收族卹孤。養老教穉。悉由家廟。祠田資之。而不統於大宗。談者以家廟爲宗法之遺。甚矣其不攷於流變也。繼自今。姚氏之孫成學方聞者。當日以多。其勉循禮俗。蛻化之迹。以崇其先。毋誣於新說。謂廟祀爲封建制哉。民國二十一年冬。章炳麟撰。

古驩室記

余友鄞張之銘伯岸。少而賈也。而好書。得中外圖籍以萬數。盡能讀之。尤好古善本。至於老

不衰。初伯岸少時。已自習史志地理算數。會學校興。與諸友立實學通藝館於上海。儲儀器以待求者。當是時。人人以爲故書雅記無益於用。而舊家藏書者。其子弟多不材。率舉以易重金於海外。伯岸數數遊日本。見之。歎曰。不及百年。中國圖籍盡矣。以其餘資。稍購取爲兩藏。一在上海。一在日本。民國十二年秋。日本東京地震。所儲書皆燒。因壹意規畫。其在上海者。自四部釋典。道書。以逮近代學者所著。及諸碑版書畫地之版圖。歲益增廣。即得舊刻與好寫本。必躬自繕補。志其所從來。凡爲書如千部。碑版以下如千卷。檢以目錄。部居不雜。署其藏曰古籟室。由實學通藝館西行。則其藏也。自伯岸少壯。儲書至是。蓋二十餘歲。年六十。鬢班白矣。鄞之藏書者。明時稱豐氏。豐氏書後歸范氏。世所謂天一閣者也。今幾四百年。而其書耗散。無有成部帙者。萬季野亦多藏書。季野歿。其弟子錢名世竊載以去。然則伯岸之書。其遂所以保世耶。曩其散在國中。今之散在異域。拾其散於異域者以歸。疆識閱覽。足以自虞樂。後雖再散。猶在國中也。人家有玉石故銅器。不能保後嗣無失。要不委於莽。則止語曰。囊漏褚中。斯伯岸所以汲汲然不憚其勞歟。伯岸爲人。誠欸有溫藉。與人處。在賈言賈。遇士人語文籍事。分畫精敏。未嘗有所失。性不好弄。時過人舍中。其人或會聚博戲。伯岸輒辭不與。人常爲置獨坐。坐定。舉茗飲。與博者談笑如故。素不嗜酒。而會飲亦極曠。其好古蓋天

性也。余與伯岸交三十年。余長伯岸四歲。少時所得書。散亡略盡。而伯岸亦漸老。觀其所爲。在上論譁囂中。或視之不甚重。更數百年。見其書。安知不與豐范所藏並也。志之以俟好事者。民國二十年六月餘。杭章炳麟撰。

量守廬記

中央大學有師曰黃侃季剛。六年教成。築室九華邨。命之曰量守廬。取陶靖節詩義也。靖節自知飢寒相擣。然不肯變故轍以求免。今季剛生計雖絀。撫圖書厭飲食自若也。其視靖節窮蹙爲有閒。猶爲是言何哉。夫貧富豈有定程。衰世之士。或仕宦二三歲。家累至於鉅萬。細者如學職。號曰褐夫之守。校其所得。有什百於儕伍而無算者矣。然仕者非變其素節。教者非心知其不然。故出其昌狂妄言。則不得至此。今欲取朱紫。登臺省。突梯足恭。以迷其國而自肥。是亦有命焉。非士大夫所盡能也。寡得以自多。妄下筆以自伐。持之鮮故。言之不足以通大理。雷同爲怪。以銜於橫舍之間。以窃明星之號。此非吾季剛所不能也。子夏七十子之駿者也。學三年而臞。以義利交其胸中。故曰學不至穀。豈易得之哉。近世長沙有皮錫瑞者。故習江戴諸儒之學。江戴所言。慮猶不盡契。故書雅記。然頗覈實矣。術既通而時方驚今文。玩奇說。守其故。則不足以致犬酒之饋。乃去習今文。一時學子輻湊其廬。號爲大師。今錫瑞

之書具在。起死者質之。則必知非其心所厭也。固曰有所利之也。况茲末學奇邪之論。其易什倍今文。而利且百之。夫季剛之不爲。則誠不欲以此亂真誣善。且逮於充塞仁義而不救也。靖節不可見矣。如季剛者。所謂存豪末於馬體者矣。雖然。靖節沮溺之倫也。於慧遠之事佛。周續之之說禮。猶有所不滿焉。季剛於靖節。未也。抑猶在陶周之閒歟。民國二十三年九月。章炳麟記。

附與黃季剛書

季剛仁弟足下。前由旭初轉交一片。屬撰量守廬記。酷熱不能握管。遷延至今。甫於昨日脫稿。文尙不俗。其中所述皮錫瑞事。乃昔年得之葉煥彬者。非臆造也。來片欲裝三尺橫幅。吾所書不過及半。或加以跋尾。亦勉強可得此數。旭初屬作寄庵一額。亦於近日寫好。說文無庵。據戴記引書高宗諒闇。鄭注字應作闇。此字亦不莊麗。故就鄭注闇讀如鷓。借鷓用之。茲將記文封寄。祈即察收。麟白。九月二日。

黃季剛答謝書

九月七日弟子侃叩頭先生門下。奉到二日賜書。及尊撰量守廬記。歡慶感激。殆不可任。唯慚冀朽。徒勞彫拭。謹當尋繹寶訓。勉之畢生。不隳師法。以酬恩造。侃以故里荆榛。萍浮

非計。謀斯環堵。聊庇妻帑。不謂樹蔽臺南。有似隰斯之宅。濠經堂下。非鄰子罕之家。鄙此蓬廬。猶虞侵奪。九域不靖。一室寧論。但令圭竇。託尊文以傳于來葉。斯厚幸也。順風陳謝。未盡懇款。感厲之忱。伏維垂鑒。弟子黃侃叩頭叩頭。

黃氏藏書樓記

項王有言。書足以記姓名。人至沒世而名不亡者。書持之也。故知書則知榮辱之分矣。莊周欲絕學捐書。以潰其名。世終弗徇。寶玩之未嘗衰。甲者侈其博贍。期與中秘書競勝。乙者亦隨所嗜。以爲度藏。上以承其先人。下以求自補過者。衆矣。情固有不能忍者也。華亭黃氏者。余先王妣家也。清嘉慶中。徙浙之嘉興。逮今百餘年。而膺白始以朝官著戶籍于杭。膺白於先王。妣爲弟之孫。宦旣通。俄而倦游。則上述其先人友樵丈之志。入莫千山。樹樓藏書。以無忘世德。而爲反初服計。樓成。屬余發焉。以志其事。余少時聞黃氏尊屬子周丈者。尤好書。家貧。每得銀十兩所。輒造書肆。盡之。性樸拙。亦不盡通其義。嘗以雜職待敘浙江。人或誠之曰。初謁撫院。宜自飭容止。無喋喋作簡明目錄語爲也。遽大言曰。皇帝尙當見。何撫院也。以是人點焉。以爲翫。卒落魄。不遇以終。亦不遺鄉里惡聲。顧其好書不可尙已。今聞友樵丈之風。乃知黃氏勤學敦古。世相漸濡久矣。後之人誠不可以無繼也。自墳籍之興。仍世逾富。今佚

書時出四庫外。非有力者莫能具。非其材亦無由徧觀。當友樵丈存時。亦時蹙蹙不足於財。雖好書。固弗能廣致。今膺白有其力矣。材又足以周覽之矣。所謂勝其任而愉快者非歟。雖然。人固有一患。非讀書難。周用非難。求令聞非難。完之則難。吾視膺白非廓然忘其名者也。當今之世。道衰人澆。求點焉以爲嚮者固罕。如膺白者於仕宦得聰慧名。顧亦自用其嚮。不遽馴伏於彊有力之人。以是拒鄰援。故位不極尊寵。名亦不至於大辱。由是日進碌碌然。以樸拙自將。蓋所以上思承先。下思補過者。固非有佗道也。余老病且入墓。異日稱與無稱。固弗計。獨念與黃氏三世異姓之好。懼膺白需於去就也。故如其請。作是記發之。民國廿五年三月章炳麟撰。

太炎文錄續編卷七日

章氏叢書三編

卷之上

摩訶車箴

民國五更贊

成章學校贊

朱曼君先生像贊

羅母白太夫人贊

祭孫公文

孫仲闓誄

李母闕太夫人誄

卷之下

自定民國五年出都以後所作詩三十八首

十七年以後所作詩十六首

錫麟學校贊

南通費君贊

馬涌伯先生像贊

祭黎公文

項松茂誄

太炎文錄續編卷七上

章氏叢書三編

摩託車箴

穆穆乘輿。五路有制。黃屋雖崇。厥心猶厲。彼摩託何。青蓋赤棧。小人所乘。君子之器。上慢下暴。陵轢無藝。兼國與鈎。而竊載以逝。盜思奪之。兩寇交弊。走馬司糞。敢告在勢。

民國五更贊

香山先覺。激揚民主。狎交宗帥。不更戎旅。私智自矜。賴茲匡輔。迫竄良將。夷其肢股。屢跌復振。逢天之祐。孫文

項城梟鷲。剿胡由蘖。良金善賈。銳師棋列。亢龍之進。淫名是揭。網漏坤維。位替身蹶。敗不出奔。于今猶傑。袁世凱

黃陂長者。愛國若性。承彼樂推。徂以求定。人皆貪邪。我獨廉正。不援朋黨。臚言兼聽。仁而不武。陵夷爲病。黎元洪

善化溫溫。續被軍人。奮迹南夷。乘旄漢津。略不致遠。進先羣倫。義不務高。退全其身。人菴已枯。遭時之屯。黃興

邵陽險健。觀時進止。事上能順。總師有紀。詰朝虎變。日雪國恥。莫府上陵。息肩海澨。譎哉二桃。而傾三士。蔡鏗

錫麟學校贊

不有先導。誰啓大邦。烈烈徐公。智勇寡雙。一震之威。計在畫江。赤心雖剖。虜志亦降。千秋馨祀。懸名旗旌。

成章學校贊

中原向明。海隅未曉。陶公孟晉。與徐分道。誠動賓萌。義夫雲擾。殺身之由。志大地小。薰蕕判矣。終爲國寶。

南通費君贊

民國元年十月十七日。南通費鑑清卒。君以厚德聞鄉里。時爲之傳狀銘誄者已數人。十六年十二月。其長子師洪移寫諸家銘狀以告于余。而請爲誄。余觀君之素行。誠有足以激墮俗者。且雅聞師洪賢。不可以辭。雖然。襄事既久。誄之非時也。于是爲之贊曰。

夏后之胤。費褒杞繪。枝葉扶疎。宅是海陵。世載良輿。薈如雲蒸。積厚流廣。子孫繩繩。繫君齊慧。幼通羣籍。孺慕之性。逮長不易。牽車致粟。筭以千石。深藏若虛。操券無責。長德在躬。惠及

疎。逖。直。歲。之。康。野。無。積。聚。人。皆。操。奇。君。獨。廉。取。寬。其。賞。貸。平。其。斗。斛。陰。作。發。歛。以。振。貧。窶。豈
曰。水。涸。魚。沫。相。吻。一。塵。之。潤。擬。于。京。庾。遺。人。廢。職。輿。梁。不。修。君。實。度。功。屬。于。橫。流。長。菱。牽。石。
員。方。相。投。迺。就。大。桁。以。更。方。舟。連。軺。斯。兌。牛。後。不。鱗。履。道。坦。若。速。於。置。郵。孝。弟。力。田。孔。德。之
盛。令。聞。如。君。而。不。從。政。我。思。古。人。窮。達。皆。定。華。冠。屣。履。仲。憲。非。病。中。紺。表。素。衛。賜。非。佞。豐。約
雖。異。咸。謝。秩。命。高。之。乘。車。出。則。存。鄭。蠡。之。千。金。處。則。卻。聘。詘。伸。雖。異。各。遂。其。性。唯。君。優。游。秉
德。則。勁。秕。糠。軒。冕。遠。茲。泥。濘。謂。之。素。封。庶。方。先。正。日。居。月。諸。鑽。燧。婁。遷。自。君。之。終。一。十。五。年。
鄉。井。載。德。人。無。間。言。巫。陽。下。招。肸。蠃。在。天。我。聆。清。風。中。心。愀。焉。申。薦。悲。誦。以。吟。九。原。康。惠。之
號。千。秋。罔。騫。

朱曼君先生像贊

海。陵。之。彥。唯。君。闊。步。訓。辭。深。厚。翰。音。飛。翥。以。彼。良。材。屈。身。戎。路。簪。筆。樂。浪。治。書。立。苑。嘉。之。解
嘲。宏。之。作。賦。才。固。絕。人。卮。亦。難。度。君。歿。韓。亡。金。遼。多。故。今。遂。耗。矣。君。離。其。汗。

馬通伯先生像贊

文。章。之。寄。是。唯。縱。陽。公。殿。其。行。聖。澤。斬。矣。新。學。披。昌。公。能。憲。章。括。囊。六。藝。大。典。洋。洋。三。經。作
綱。我。瞻。法。象。既。溫。以。方。沒。齒。不。忘。

羅母白太夫人贊

夫人零陵白氏。適同縣羅君。少實嬰顛。辱守女誠。來嬪事姑。蓄順無忤。侍疾奉湯。便蕃牀蓐。仁孝之稱。內外靡間。羅君既歿。與兄公分宅。子女四人。貧食半菽。索綯分臬。所其無逸。督教所生。譽譽有厲。既而子霖等各以戎事貨殖成名。豐嗇代處。視如儻來。浣衣敝裘。不愆其素。蓋藏有餘。即以周乏。可謂示民不佻。慎始敬終者矣。年六十四卒于內寢。贊曰。

九疑之岡。實奉湘君。飈流橫被。遺澤未涇。淵哉羅母。淑慎其身。上順尊章。俛敕後昆。窮達任運。何德之純。嬪虞信美。不化商均。烏工雖智。不感頑嚚。鼓瑟之樂。不利耕耘。孰若此母。始卒盡倫。孝慈備矣。如玉斯溫。大夏非侈。茅茨非貧。德廣所及。施於江濱。

祭孫公文

年月日。餘杭章某謹以清酌。庶羞致祭於故臨時大總統孫公之靈。烏呼哀哉。汪是大國。古之丹楊。始兆漢季。鑿剔莫當。劉石千紀。登琅邪王。姚姒正朔。湊茲南方。濠州伉起。北賓犬羊。乃植大都。阡陌有章。蠢爾胡清。軼我神疆。繼明兩作。公振其綱。惟公降生。挺於嶺外。少則屈奇。辯口能說。擾役俠士。在海之瀨。西厲大秦。脫彼羈馱。惠陽授兵。舉其白雉。卻入東嶠。驍名始大。總翕羣材。不棄葱籬。夏聲昭播。莫我敢爭。十有七年。女真以喙。有衆後后。宅此江介。初

制共和立政良難。五權之憲鬱菴未頒。敝屣南位。以讓北藩。北藩伊何。虜之餘戈。雖悔輕授。盟不可寒。純鉤倒柄。裂我屏翰。龍蟄海隅。驚氣不騫。僭帝始僵。又滋狼獾。再建番禺。西南結盤。齊州天度。懋屏于蠻。公之天性。伉直自聖。受諫則難。而惡方命。有勇如螭。以鼓羣勁。揮斥幣餘。視重若輕。屢屣復完。亦不凝定。粵府再踣。未匡其政。鋌會北平。以身入穿。肝鬲醮矣。天祿爲罄。烏呼哀哉。繫昔明祖。始登雞鳴。乃醴沛公。薦號伯兄。明祖入雞鳴山。歷代帝王祠。至漢高祖前。遠曰大哥。得天下與朕同舉。酒勸之。惟公建國。繼步皇明。大饗寢宮。眇告武成。公正位南都。清主退位。率將吏詣孝陵祭告。急難在原。千年同情。遺言首邱。洪武之京。惟其得一。故爲天下貞。烏呼哀哉。天生我公。爲世鈴鐸。調樂專壹。吐辭爲燧。百夫雷同。臚旬傳諾。余豈異郵。好是謬謬。蘭之同臭。石之攻厝。如何南樞。委命窮朔。沮公北盟。終亦不獲。陽冰稷雪。公之往託。楊柳方蕘。公之殂落。剗腸止腐。寧戰敗而搏。夜光爲棺。寧暴尸于郭。欲招其魂。天地寥廓。弔以生芻。忠信猶薄。歟公之功。庶其合莫。烏呼哀哉。尙饗。

祭黎公文

中華民國十七年六月日。謹以清酌庶羞。致祭於大總統黎公之靈。烏呼哀哉。天建真人。固無常姓。承彼樂推。徂以求定。興自一旅。若有符命。苟非羣策。疇與爲僚。中遭陽九。羽鬪鍛傷。

江漢之美。去之堂堂。再仆再起。威積不揚。如艸斯菸。擊於嚴霜。公之大節。羨里之後。衆枉害直。係命虎口。武義疏爵。金印如斗。正色嶷然。舍生何有。伊古人傑。應變爲巨。如公貞恆。何行之躡。羊羹不斟。敝袴不予。旅之焚巢。誰固吾圉。宸極既遷。國本亦替。五色之微。弁髦是敝。遼東觥觥。匡此神器。誰能死綏。公獨高厲。烏呼哀哉。滅頂之凶。斃于撓棟。竊鈎負乘。蒸報相闕。彼素王何。棄如撥糞。曾是贅游。相引爲重。烏呼哀哉。公始蒙難。洪憲椽之。滇府杖順。足相扶持。後雖再圯。玉步未改。誰殄民國。問之南海。烏呼哀哉。創業三人。鼎足而守。彼皆畔換。公獨不負。杵臼千駟。伯夷采薇。董史有作。榮名誰歸。烏呼哀哉。尙饗。

孫仲闔誄

余始因宋恕平子識仲闔。平子者。仲闔姊壻。素負才。牢落不耦。而仲闔承其先人侍郎公學。搏心經制。有用世之略。初以通家謁直隸總督李鴻章。嘗教習北洋水師學堂。提調軍械局。以知縣用。歸主瑞安縣中學堂。及武昌兵起。浙江應之。奉檄署瑞安縣事。民國初。入京師。供職鹽務署。余時以東三省籌邊使解官被禁。仲闔顧時時來。談經引篆。意氣清發。自忘在鞅絆中也。如是數歲。黃陂黎公繼大總統任。黎公故習業水師。念仲闔有師道。特徵充府顧問。兼國務院顧問。國史館纂修。地雖清峻。然未嘗一日得與政事。後十年而歸。以鬻書終其身。

至民國二十三年而歿。以仲闔學行之劭。得其時。雖至卿貳不爲泰。逢遭衰亂。抱利器無所施。蓋與平子際遇無大異。顧平子天性屈奇。旣失意。往往侘傺不平。或時爲玩世狀。而仲闔守其鄉先生葉正則之術。與物端和。動必由禮。乃亦奇觚於世如此。其作篆根柢深固。從心變化。視世所傳常熟楊氏安吉吳氏書。雅鄭相絕。不可爲量。然名亦不出浙東。以是知世之識眞者寡。亦不遇治世使然耶。余與仲闔別十餘歲。各皤然近七十矣。常冀其來化我。而仲闔竟歿。自是以往。吾道益孤矣。誄曰。

彼隨珠兮不琢。彼籛桂兮不可植於町疇。嗟夫子之經奇兮。絜漢宋而同貫。寧懷寶以迷國兮。固遭時之泮奭。鳴鶴之在陰兮。自前哲而故然。操一技以華國兮。世猶狎以爲近玩。塊抱蜀而下世兮。曾未申其羽翰。吾悲夫宋子之徇齊兮。擢短衣以蔽骭。子吾繫此匏瓜兮。亦攔落而無畔。與夫子而參會兮。終不登於高岸。諒長夜之未暘兮。誠委命其何怨。

項松茂誄

故人項松茂以文士託於賈。依遠西法製藥。人甚便之。家旣給足。遇事振貸無所吝。性好書畫。得明嘉興項氏遺物尤多。民國二十年冬。倭寇關東。侵尋及上海。即陰部勒義勇軍爲之備。爲敵刺得。略其肆中十一人去。松茂奮自求之。再入敵斥候中。卒爲所掩。厲聲罵賊。被殺。

時二十一年一月三十一日也。事祕。家人不審知。久之。同繫者出。始得實狀。子隆勳等以二十三年三月發喪。且出松茂存時手書。稱臨大節。則達生委命。嗚呼。其所蓄者深矣。余素與松茂交。亦未知其弘毅如此也。乃爲之誄曰。

君之賣樂。上希韓康。厥志超奇。士也非商。名筆千金。盈於篋藏。富而能施。雖滿不剝。憬彼東鯤。軼我樊牆。發憤厲士。陰爲橐囊。賊諜宵掠。部曲磷傷。兩入虎口。以救失亡。天乎不淑。膺此巨創。臨難抗辭。厥聲琅琅。乳雞搏狸。怒駒踉蹌。決計長暝。何德之剛。乃歲初蜡。與君同觴。曾未三旬。幽明異行。發君遺墨。持論激揚。溝壑之念。志士不忘。豈曰橫天。允蹈大方。爲義捨生。是爲國殤。

李母闕太夫人誄

騰衝李根源。嘗以軍事參西南軍政府。軍政府敗。根源獨不撓。後遷農商總長。爲大總統黎公所倚。黎公敗。根源從亡。至天津。南氏上海。期倡大順。卒不得。炳麟多其義。而與爲昆弟交。登堂拜母焉。時闕太夫人已老。根源以世亂不求仕。築室吳葑門下。盡色養之道。太夫人性儉素。未嘗御文綺。對人誠欸。子雖貴。督教之猶嚴。民國十五年冬。根源自吳來。道太夫人患瘰癧狀。瘰癧者。詩所謂鼠憂以瘁者也。少壯愁思病肺。多有之。至老得是者。不數見。且以根

源事親有道。閨門熙熙。又辟場圃。樹卉木。以適游觀。顧何以得是。十六年春。訃書至。會兵禍。拏結。咫尺不得通音問。其冬。根源始以曲靖孫光庭所作碑銘來。乃知太夫人所以得是者。非勤其身。蓋爲天下憂也。烏呼。斯可以厲俗已。乃爲誄曰。

坤維之野。棲媪神兮。少實袞瘵。善自珍兮。嚴事威姑。宜家人兮。制榦僮御。秩無文兮。嚶嚶教子。惠以閭兮。子也亢宗。蔚成勳兮。處茲光寵。晏如貧兮。褒衣大綈。謝葩紛兮。省稼自怡。具區之濱兮。烏呼不辰。區宇裂兮。詭言朋興。無繩臬兮。民如野鹿。公相竊兮。奇服不衷。逮嬖孽兮。朝野爲市。大賂誅兮。倒戈之釁。帥數奪兮。迺延虜俗。起駱越兮。覃及四方。爲臬桀兮。朝而榮華。其夕竭兮。綱紀蕩蕩。四維絕兮。哀彼憚人。汽小歇兮。烏呼昊天。茲不聰兮。不自先後。丁我躬兮。匪緯是恤。憂國之彪兮。獨寐愴歎。摧膺匈兮。寧去濁世。期長終兮。臚臚吳原。高墳穹兮。揚靈昆侖。神罔恫兮。

太炎文錄續編卷七下

章氏叢書三編

手寫民國五年出都以後所作詩三十八首

自嶺海南行抵閩婆爪哇五年

昔有中貴鄭三寶。手持玉節征南冥。餘皇西邁過身毒。頸系名王還漢廷。宮嬙下嫁號翁主。蠻中如望天孫星。代身金人始獻質。王會大開炎海清。餘威至今震島嶠。閩婆祠廟揚精靈。明清代謝日復日。日月光華今皓旰。貫頭卉服紛入市。大號俄然未渙汗。上兵豈必務伐謀。信行蠻貉真多算。君不見咸陽失鹿方五年。尉佗屈強猶爭先。箕踞椎髻延漢使。自問孰與皇帝賢。璽書一日布德意。桂蠹跪陳前殿前。

黑龍潭 以下六年

昔踐松花岸。今臨黑水祠。窮荒行欲匝。垂老策無奇。載重看黃馬。雲南皆以馬任重供廚致白熊。五

華山下宿。扶杖轉支離。

自畢節赴巴留別唐元帥

曠代論滇土。吾思楊一清。中垣消薄蝕。東勝託干城。形勢稍殊昔。安危亦異情。願君恢霸略。

不必諱從橫。

兵氣連吳會。偏安問漢圖。江源初發迹。夏渚昔論都。直北餘逋寇。當關豈一夫。許將籌箸事。還報赤松無。

巴歛 以下七年

金鼓且勿喧。聽我歌巴歛。人皇既荒昧。方志傳魚鳧。自從嬴秦來。梁雝糅同區。天險固可恃。乘亂資臬渠。公孫早躍馬。章武從後驅。狂狡逮諸李。王孟相乘除。明夏猶小壑。張公蕩無餘。七豪彼何人。及爾無葭葦。劍碧謂劍閣地斗絕。瞿唐鐵不逾。胡為行絕迹。鬱然構皇居。哀哉江沱上。百縣鮮完郛。守險一失道。良士皆成俘。族望無宋明。轉徙僵路衢。同室勿相鬥。相鬥利豺獮。

辰州

天道有夷險。神仙非久長。秦皇與避世。陵谷兩茫茫。辰州即漢武陵所屬。桃源當在其地。非今常德之桃源縣也。熏穴兵

符峻。變但相攻。實者避入山嶺。敵以藥然火熏之。無不死者。謂之熏洞。官軍攻變亦用此。探丸盜迹狂。中流值漁父。相對涕沾裳。

桃源歎 去辰州作

五谿天下險。叢桃何便娟。欣然裹糧至。所求喬與佗。涉水患湍積。登陸迷哇阡。役夫殊健飯。

三升猶枵然。解滕到吏舍。諸偷方闐闐。長官日卷臥。黃金勒膺前。昨者起軍府。罷癘不盈千。清浪虜已逼。山寇復揉撻。流黃一煎餌。沆瀣沖黃天。羣仙獲兵解。蟬蛻隨飛煙。桃根斫斧盡。桃葉從風遷。已矣下瀨去。清沅莽無邊。

長沙何氏園 以下九年

君是雲中人。主人雲南產也。來卜雲麓舍。草樹蔽埃壙。觴菴永晨夜。未見雲中人。棋聲落巖樹。

岳麓

明發度湘水。相牽登絕巘。出郭無半驛。隨磴近千轉。纍纍冢相似。冥冥露猶泣。隔峰聞雞鳴。開徑杜鹿曠。秋風日夕來。草靜沙亦淺。成功古不易。告歸今始免。笑彼上蔡豪。父子哭黃犬。食瓜 以下十年

膏火長爲患。呼僮且買瓜。不辭停濁酒。正爾醉流霞。卻熱頻添淩。承塵爲籠紗。青門戰方劇。莫問故侯家。

老欲灌園去。於陵已陸沉。海隅沙正白。塞上氣猶陰。大實能寒膽。明燈不繫心。休將天子樹。還以換兼金。

弔易白沙 坤

新會有大士。卜居近白沙。冥心契玄牝。志欲陵雲霞。樊籬在名節。吐辭無奇邪。苕苕四百載。名字何相若。探古詆黃農。視世如浮苴。南轅北有轡。噉此苦與荼。聞子稅駱越。江門行無遮。蕩蕩跣弛材。齒頰流芬葩。錢刀斂衽拜。鉏耰諍阿耶。蘭滄豈同御。歲晏誰爲華。何不登陽春。緼櫝而藏諸。賓名未旣實。令人長咨嗟。

大學

北風吹空沙礫起。勞農笳笛聞邊裏。學童騰蹕如飛狼。虎皮先生寒作羊。嘶聲傳語且歸沐。燕趙佳人美如玉。成均六代音已衰。伶簫倡舞亦可爲。詩中曹劉真老兵。新朝鼓吹宜鼉鳴。冒頓英靈頭曼朽。物寄瓶中更何有。竭來舉旛稱攘姦。須臾佻達城關間。慶卿圖窮終見匕。敢爲錐刀爭一死。焚書坑儒信有人。未必陳吳爲報秦。

九日

國亂竟無象。天高空我知。出門時傍菊。中酒復盈卮。談笑隨年劣。清狂入道遲。危樓亦乘興。恨乏九能辭。

防疫

以下十一年

高柳日光赤。飛塵亂度牆。濟生無橘井。隱背尙藜牀。竈上若新菜。階前杼醉漿。何當赴龍窟。

一寫百金方。

少壯日已去。員與存舊人。暴書常苦熱。裹藥暫宜春。湯煖浮筒桂。盆堅擣細辛。頽齡如可度。焉用坐庚申。

思岳陽

大江至荆楚。天險爲之開。昔過新牆驛。遙憐宗袞才。家驊事伯佐何中湘守岳陽。大荆新牆二邑文持殘破。滿二年。萬山

如馬度。獨戍有龍回。湖外今無事。飛雲自去來。

得友人所贈三體石經。以下十二年

正始傳經石。人間久不窺。洛符無故發。孔筆到今垂。八體追秦刻。千金睨華碑。中原文武盡。麟出竟何爲。

歸杭州

故園時一至。妻子又攜將。爲有西山爽。而宜首夏涼。明湖澹雲月。坳郭下牛羊。旦晚胡笳動。尊羹不易嘗。

聞旭初監屠宰稅

爾昔作郎吏。清譽頗絕俗。失意黃綬中。監門無乃黻。侍史列卿相。高材滯輿僕。不見里社下。

陳平美冠玉。

晉以下十三年

當塗既訖錄。要裊騰在天。威德震殊俗。武庫藏戈鋌。野無犬吠驚。穀升直三錢。如何夕陽亭。荀賈來相煎。今年降歸命。去年任劉淵。此坐足可惜。寧知天道然。

金磨龍歌

陳子_{樹藩}贈我銅繆龍。塗以黃金中函空。乘輿馬耳厥號磨。三十六兩今衡重。長安高原培地得。法物墮在囂塵中。罇鱗文鏤雖闊大。紫磨鮮明千載同。太常若猶辨輿服。私家豈得儲箱籠。王制埽滌堂陛盡。匹夫懷璧情無忭。周漢宰樹已半伐。守護壤地宜施功。自從四海起馳道。白骨棄遺如委蓬。桐人寓馬隨地見。蕃客時買雙鑿鐘。南山錮槲固癡絕。長夜猶願恬安終。老余玩物亦悲古。忍令發丘長自雄。

展亡友鄒蔚丹墓因與印泉議治墓道

以下十四年

窮兵向一紀。跋行常偪仄。故鬼今如何。骨肉求未得。昨歲逢老圃。委曲示行色。導我錢漕廟。爲我指陞防。荒丘一畝餘。灌莽梗衣袂。哀慟陳酒黍。寒泉儻可食。遠念黃花岡。賢愚共一域。茲登雖叢爾。吾曩猶挺特。生死閱兩代。宿草無消息。招魂空遐求。一顧殊在側。努力召巧匠。

爲子樹石刻。石刻豈足報。零涕霑茵軾。

長沙謁賈太傅祠

高鳳縹緲遺清影。公去何之石牀冷。祠有太傅石牀未央宣室長寂寥。千家尙飲先生井。

聞廣東毀文廟以下十五年

萬物本芻狗。天地非不仁。君看九流起。燔書資狂秦。狂秦尙持法。清談能食人。校官久失度。佻言來丁寧。魯叟靈已邈。何必歆明禋。

觀鄭覲文作樂

鄭生儒者能清謳。樂綜古今姚且幽。曾奏滿城風雨曲。鄭自製擔夫在道皆回頭。金陵莫府素好事。招我觀樂升南樓。鈞天雲門雜衆技。編簫長笛和箏篪。鳴琴窈窕駐鸞鶴。引竿駸駸開華驢。清壤瓷斗人醉齒。錦瑟倍弦魚出湫。鞀鼓間作亦赴節。好奇不用銅丸投。忽度清商翻楚調。潛氣內轉殊凡喉。飄然便起陵雲思。大人輕舉風前猴。曲終吹律中夷則。惜哉鼓簧如對牛。風生黃葛退舉酒。滿堂神動驚清秋。顧視壁間陷神讖。東吳靈氣今存不。鄭生鄭生歌且休。銅馬徧地爭王侯。九韶如可化蠻越。羅闈何事陳戈矛。

白紵歌

羅縠常患塵。織成常患齟。誰當如白紵。鶴毳不可。貂裘不耐雨。誰當如白紵。酬行嚴天津寄詩

十年誓墓不登朝。為愛湖湘氣類饒。以歲漸知陳紀老。量才終覺陸雲超。長沙松菌無消息。樊口鱸魚乍寂寥。料是瀛洲春色早。羈人樓上更憐憫。

避地以下十六年

聞道王江涇。依釋名借為直。波曰徑之徑。晨朝已度兵。天黃傳語怒。赤伏見旗明。肉食嗟乖計。春農待轍

耕。生涯吾自拙。恐未飽羣生。

師子

吾聞師子似虎尾如斗。今徒被蠶之蒼狗。一鳴噤獸人豈聞。搏象靈威邈何有。草中長眠志已了。况以太牢餽汝口。偃牙齧斧苟如獍。鐵檻其能長繫守。惜哉門前雙石範。幻身尙足驚人走。師子聞之怒銜骨。鰕生何爾訾英物。世間形法多支離。牝牡驪黃那得知。蔡澤雄辯乃鬪鼻。尼父大聖如蒙俱。項王對人語姁姁。張良婦容無魁奇。以貌取人失子羽。按圖寧得華山騏。君不見麒麟麕身虎似狸。豕形人立稱熊羆。朕也似狗何足疑。得友人贈船山遺書二通

天開衡嶽竦南條。旁挺船山尙建標。鳳隱豈須依竹實。麇遊長自伴松寮。孫兒有劍言何反。王者遺香老未燒。一卷黃書如禹鼎。論功眞過霍嫫媯。宴坐起。

八月樓居者。金風不感涼。黃連時作飲。朱印並晞陽。簡出衣常故。安禪酒漸忘。晚來新雨足。丘蚓欲窺堂。

龜鼈

上海大世界園有物如龜。云自嶺海隨浪而下。爲舫人所得者。大若圓案。重二百六十斤。文似瑤瑁。然甚粗劣。嗚吼如鵝鴨聲。四足如鱗。縵胡無指。余與旭初鷹若同觀。識爲龜鼈。因賦是詩。

萬里清江使。漁師未識顏。倒瀾輕自試。靈氣向人孱。無趾眞遺士。長鳴尙護斑。儻能隨海若。莫爲朶頤還。

田家

拾芋荆籬下。荆上霜未晞。縣官今劭農。誰家趨朝歸。蹊然頓步履。躑躅從二妃。識君善耨蒲。今是大農非。朝者語田家。神化固難幾。終歲事耘耔。所收纔療饑。白圭道已歿。計然寧足希。

南海起上聖。貉桀相因依。授我青赤旛。被服緹罽衣。冉冉陌頭行。翕翕生光輝。大農耕都市。何必鉏葵蒂。不見古重華。龍騰興側微。公孫封平津。豈復顧牧豨。爾曹但燕爵。黃鵠能高飛。感君神農教。謀富有樞機。願棄籬中芋。朝端芋方肥。

感事

珠江閒氣開雲鼉。掉尾渚宮東入鄱。鍾山積甲森嵯峨。素車白馬度滌和。垓下四面鷄鳴歌。天欲亡我非由他。鼉去鱷來當奈何。

寄亦韓仲蓀

蹈海千行旅。磨堅一秃翁。蒹葭隨露白。鴻雁入雲空。地坼成初郡。民勞不素風。試吟紫芝曲。應與夏黃同。

夜飲

秋半月如練。婦子陳肴具。晚菘時已甘。稻蟹亦在御。賓朋雜坐期一醉。觴酒亂行無次數。老夫暫前詣杯案。奉卮逡巡徐又住。諸友對我笑。學道何陵遽。將非事禁方。委形成藥樹。吾儕口腹固有量。雋永當前亦下箸。樽間通人或中聖。曲奏將軍尙回顧。豈爲求肥食糠覈。亦未尋仙吸風露。君不見洪山芸臺君。山柑大頭魚出嘉陵南。普洱之茶宜酒酣。漫遊興至恣豪

飲。百年豈論殤與聃。關梁圯隔珍物壅。黔黎茹蓼貪夫甘。本味不逢伊尹出。一麻能勿師瞿曇。

生日自述

蹉跎今六十。斯世孰爲徒。學佛無乾慧。儲書不愈愚。握中餘玉虎。樓上對香鑪。見說興亡事。拏舟望五湖。

十七年以後詩十六首

春日書懷

戊辰

儻居雖近市。弇關如深湫。書史有常度。井竈無停漚。肉食漸忘味。時復親乾餼。承泉治百合。壅蘭澄麻油。初日上露臺。暴我殺羊裘。客來固不速。晝眠亦無郵。人生貴適志。大行非詭求。夸父既棄杖。東野方傾輶。文淵矜顧盼。終然困壺頭。借問茂陵兒。何如馬少游。

銅雀

戊辰

銅雀復銅雀。歲星俄已終。問君何棲止。委身荆棘中。赤眉軼海岱。長狄潛金墉。平臺一以望。永負分香翁。

季剛旭初行攝山得大小徐題名以墨本見示

戊辰

五姓蕩無紀。鬱然生二徐。非徒博墳籍。抗志明六書。頡誦雖懸邈。豪端見皇初。自從唐社遷。遺文鮮殘餘。繹山數傳刻。燹魂亦已枯。莽蒼大麓閒。灌木成儲胥。豈無攀蘿客。蒿目徒睢盱。神物信有合。道通無方隅。律律四秦篆。千載起廢虛。菱杼雖微泐。筆迹猶盤紆。偉哉名教力。因子爲玄符。寶之篋笥中。奚翅隨侯珠。

長夏紀事 己巳

我本山谷士。失路趨堂廉。伐華旣十稔。重茲風日炎。荃葛甫在御。短製無垂檐。粥定正代葺。齋美如遺鹽。啖此勝百牢。披襟步長檐。藹藹出牆樹。淙淙筒中澱。市閭或問字。百名方一繅。漱筆藉顛棘。澱盡穎自銛。掄玉得越巾。破風逾蒼澁。故書適一啓。蠹食殊無綬。呼童下香藥。胼汗勤自拈。平生遠膏沐。兩鬢常鬢鬢。朋來跣不襪。夷惠宜可兼。時復效禽戲。而不求青黏。但爲滌塵慮。焉識速與淹。大化苟我適。老洩終如緘。

附致季剛旭初書

夏日吟詠。往往少山水風景。則以避暑不出故也。僕則蟄居於此。四時不異。故亦不廢斯事。適作長夏紀事一首。皆附事實。故反多新語。因自來水無名可施。以釋水泉一見一否爲濺。即以名之。此詩略脫向日窠臼。雖然。不追步陶謝。恐與蘇黃作後塵矣。

題瞿太保及孫簡討像 庚午

我志在春秋。推鋒屬建州。春陵終紹漢。宣榭是新周。故國山重秀。先賢事再搜。東臬遺像在。長恨未同舟。

身共皇明盡。須眉尚凜存。乘城雙擁騎。晉王李定國拔桂林時人見公與別山擁驢從入城俄孔有德自焚死事見永曆實錄踰嶺此招

魂。葛靚難回面。陶潛自閉門。清芬遺畧里。樓閣至今尊。

賓川百歲泉 庚午

君問神仙術。賓川有一泉。近邨多百歲。當暑似秋天。丹穴赫相望。赤符書正妍。待逢重九日。

更訪傅延年。

人日 癸酉

塞上春風艸又新。天開胡騎蹴輕塵。南朝烟柳千何事。萬里車書付故人。

聞得賊諜 癸酉四月

金丸一夜起交民。射殺湘東舊領軍。借問長陵雙石馬。可知傳法有沙門。

聞人獻圖不遇 癸酉四月

上河圖自屬王家。采石菑田繼物華。卻恨鈴山蟬蛻久。明珠空令射寒鴉。

劉屈氂歌

中山有良子。名曰劉屈氂。雖藉皇孫貴。出身人不知。武皇置相少良死。公孫涕泣徒爲爾。聞道胡巫入漢家。長安掘蠱何誼譁。節上黃旄君自加。看君明日載廚車。

詠史 癸酉五月

鶯翎雙金鏃。俘得海濱侯。延遂王後來天水何綢繆。楚囚相對聲啾啾。勉公飽食行靈州。寶珠

未獲吾尙留。人生遇合有如此。兩國虜王何足訾。轉盼東昏宗熙飲刃死。

川南領事移任昆明詩以送之 乙亥

海客今何往。西方有化人。寧爲桂家役。不作建夷民。柳暗蒼山霧。花明麗水春。金沙天險在。

釣者莫垂綸。

宋母沈太夫人七十壽 乙亥

淑氣延初夏。平原重女宗。藜蒿猶第道。竹柏此增封。反哺終辭鮓。勤生爲解春。夫人城自固。

胡騎敢撻鋒。

詠紅豆 丙子

南風難競北風涼。日日行旌望五羊。長是相思隔阡陌。爲君遙寄紫羅裳。曠代經神屬惠家。風流猶寄一株霞。橫塘春色凋零盡。漫問曹侯宅裏花。



A541 212 0000 7516B

版權所有

禁止翻印

太炎文錄續編四冊 實價二元

編校者 章氏國學講習會

蘇州錦帆路

印刷者 武漢印書館

漢口府北一路

電話二二九五—

寄售處 武昌鼓架坡六號劉宅

~~F-25677~~

05/8-19